

Gagek Sĕn Kerisi Tato Vu Jon Nebĕ Pesepsĕn

¹ Wirek gagek sĕnĕ yō neggĕp vunsĕn, lok mĕm Anutu tato yam rangah vu Yesu in bĕ tato vu yi hur lo nabĕ: Ngaa nabĕ sĕnĕ vongin anon jak pevis. Lob vong yi angĕr yam vu sa Jon sĕn yi hur sa, benĕr gagek vu sa.

² Lob sa Jon, sa halĕ ngaa pin sĕnĕ bekevu, lob senĕr rangah bĕ Anutu yi gagek los gagek sĕn Yesu Kerisi nĕr rangah lo yōnon.

³ Gagek sĕnĕ netatekin ngaa pin sĕn rĕk anon jak vu tamusĕn lo. Om nabĕ mehōti natevin og rĕk kwa vesa. Log alam sĕn degengo lo, nabĕ degebĕ nengaj vu medesepa dok, og rĕk kwaj vesa geving in buk dus rak.

Jon Kevu Gagek Ya Vu Kerisi-yi-alam Yu Nemadvahi-bevidek-luu

⁴ Sa Jon kevu gagek sĕnĕ yōk vu Kerisi-yi-alam ham yu nemadvahi-bevidek-luu sĕn ham nedo ggĕp distrik Asia* aga. Anutu sĕn nedo gwĕbeng, geyō nedo vu nyĕdahis, geyō rĕk nam vu tamusĕn lo, losho yi ngaahur nivesa nemadvahi-bevidek-luu sĕn denare dus vu sĕa-los-arĕ lo, degevang semusemu los degevang beham ayomin gĕp revuh.

⁵ Log Yesu Kerisi mehō sĕn nenĕr Anutu yi gagek rangah nirōp lo gevang semusemu los gevang beham ayomin gĕp revuh nabĕ saga geving. Yik yi sĕnĕ sĕn kedi rak mugin vu bedub tu hil arid aguu

lo. Lob tu mehö-los-bengö böpata benegin alam-los-bengöj pin vu dob sënë. Yö ahë neving hil, lob ripek hil ngaa nipaya pin ya rak nikök.

⁶ Vong behil atu Ama Anutu yi alam los yi alam sën nehako seriveng lo, in bë hil gevong huk vu yi. Om hil gako arë jak na vavunë rot, geniweëk gëp vu yi degwata los degwata. Yönon.

⁷ Ham gwengö rë! Rëk nam los beggob, lob mehönon pin mëm yö rëk degelë jak malaj. Alam sën degelu yi rak kele los detul brëm ya yi lo, og rëk degelë yi geving.

Lob mehönon pin vu dob rëk deketul newaj gedengu rot in yi.

Ëë-ë, sënë rëk anon jak yönon rot.

⁸ In Mehöböp Anutu nër bë, “Yik sengo hevong bengaa pin anon rak vu muginsën, log sëk semu ngaa pin benivesa jak vu tamusën.” Yik yi sënë sën yö nedo vu gwëbeng, geyö nedo vu nyëdahis, gerëk nam vu tamusën lo. Nër nebë sënë, in niwëëk pin neggëp vu yi.

Jon Lë Yesu Rak Mala

⁹ Sa Jon sën ham arimin sa, in Yesu yi alam sa ving ham lo. Sa nehako maggin ving ham, lob setu Anutu yi alam ving ham. Lob hil pin nare niwëëk lok ti benekerë maggin. Senër Anutu yi gagek rangah, log senër Yesu yi Bengö Nivesa rangah ving. Senër nebë sënë, lob deruuk sa bedevong beseyam nado kedu loo vuheng sën Patmos agi.

¹⁰ Lob lok Mehöböp yi buk sën Soda lo, lob Anon Vabuung yam ggërin sa rot. Lob sa hangö mehöti aye yam niwëëk ggëp sa demig nebë sën avuuk ti,

11 benër bē, “Ngaa pin sēn gelē agi, og gekwevu dok na kapiya begwevong na vu Kerisi-yi-alam yu nemadvahi-bevidek-luu. Gwevong na vu Epesus, gena vu Smurna ga, na vu Pergamum ga, na vu Tuatira ga, na vu Sardis ga, na vu Piladelpia ga, na vu Laodisea.”

12 Lob sehērin yah in bē galē mehō sēn nenēr gagek vu sa agi, loḵ tum sa halē ram sēn desemu rak goor lo nemadvahi-bevidek-luu medo netum.

13 Lob sa halē mehōti nare loḵ ram saga vuheng atov. Ni nebē Mehōnon Nalu, geröp tob adingsekē beggērin vaha, log vaḵu kabi goor loḵ newa.

14 Log yu og yu viis yō ni veroo rot nebē ahök niviiis, genebē beggob veroo, log mala gahis netum nebē nengwah leleksēn.

15 Log vaha nepelibin nebē braas, lob malangeri benikapiik rot. Log sa hango aye nebē lubek böpata dedun.

16 Nejom betuheng nemadvahi-bevidek-luu loḵ nema vesa. Gepaēp-yu-anil nevu vahi vahi ti, benevu rot bevare nesoo loḵ avi. Log mala netum nebē sēn hes netum niwēek rot lo.

17 Sa halē yi, lob sediik besevēs beheto nahēp loḵ vaha nebē sēn heljēng ti. Loḵ bē nema vesa rak sa genēr bē, “Su gegōneng! Sa mehō muginsēn los mehō tamusēn yōnon rot.

18 Sa nado malag-tumsēn. Wirek sediik, rēk gwelē! Gwēbeng sa nado malag-tumsēn degwata los degwata. Lob kii diiksēn-yi los Nyēg-Nipayaya-yi neggēp vu sa besetu ala menehegin.

19 Om kwevu ngaa pin sēn gelē ggovek lo, los ngaa sēn genelē gwēbeng agi, gengaa sēn vongin berup agi geving.

20 Gelë betuheng nemadvahi-bevidek-luu sën nedo lok sa nemag vesa lo, los gelë ram goor nemadvahi-bevidek-luu sagi, og sënëk tahutahu mu bedegwa nebë sënë: Betuheng nemadvahi-bevidek-luu sënë tahu Kerisi-yi-alam yu nemadvahi-bevidek-luu hir angër. Log ram nemadvahi-bevidek-luu sënë, og yik tahu Kerisi-yi-alam yu nemadvahi-bevidek-luu.”

2

Yesu Nër Gagek Raḵ Kerisi-yi-alam Vu Epesus

1 “Log kwevu gagek na vu Kerisi-yi-alam sën denedo Epesus agu hir angër nabë:

Mehö sën nejom betuheng nemadvahi-bevidek-luu lok nema vesa, gevare neyoh ram goor nemadvahi-bevidek-luu vuheng atov agi lo, vong gagek sënë yök vu hong bë:

2 Serak aggata pin sën genesepa lok lo ni. Geserak hong huk niwëek sën genevong vu sa lo ni. Geserak ni bë nim wëek bekwerë vanë los kwam vesa, genim nelëlin alam nij paya. Log alam vahi denër vu hong bë, ‘He alam sinarë ving’, rëk mu sir sagak su sinarë yönon rë. Rëk ngo geseggi hir gagek begetök rak hir ngaa sën denevong lo degwa bë sir alam tetuhinsën mu.

3 Alam denelë bë genesepa lok sa arëg, lob denevong paya vu hong. Rëk mu ngo genare niwëek begenekwerë maggin gesu nim tebö nerak rë. Besënëk serak ni.

4 Rëk mu sa gagek ti neggëp rak hong nebë: Wirek sën nahën genevong ving mewis lo, og ahëm neving sa pangsën, gak gwëbeng og ma!

⁵ Wirek og genevong ngaa nivesa, rëk gevuu aggata saga ya gegeya gevës. Om kwam bo nah aggata sën genevong wirek lo begegwerin hong, log gwevong ngaa nabë sën gevong muginsën lo. Gaḵ nabë su gegwerin hong rë genama, og sëḵ natök nöḵ vu hong besebo hong ram vër.

⁶ Rëḵ mu huk nivesa ti sënë nahën neggëp vu hong: Genelë Nikolas yi alam hir ngaa nipaya sën denesepa loḵ lo paya. Lob yik sa nehalë hir aggata saga paya ving nebë saga.

⁷ Nebë saga, om nabë mehöti nenga neggëp, og gengo gagek sën Anon Vabuung nër vu Kerisi-yi-alam lo megero! Mehöti sën kesuu ngaa maggin los ngaa nipaya pin lo, og sëḵ ngoḱekin yi bega ḵele sën gevong behil medo malad-tumsën lo anon. Ḵele sën nare loḵ Anutu yi huk anon lo.”

Yesu Nër Gagek Raḵ Kerisi-yi-alam Vu Smurna

⁸ “Log kwevu gagek na vu Kerisi-yi-alam vu Smurna hir angër nabë:

Mehö muginsën los mehö tamusën sën diik wirek rëḵ gwëbeng nedo mala-tumsën ggökin lo vong gagek sënë yök vu hong bë:

⁹ Serak maggin los nivanë sën netök vu hong lo ni, beseraḵ ni ving bë devasap höm ngaa-dob-yi rot gegenedo paya yönon. Rëḵ mu hong ngaa-yagek-yi ngahiseḵë neggëp! Log serak gagek sën alam la denenër pelë raḵ hong lo ni. Alam sënë denenër sir bë sir degwa vu Yuda. Rëḵ mu su degwaj vu Yuda yönon rë, gaḵ Satan yö yi alam sir.

¹⁰ Nahub teka rë, loḵ ham rëḵ gwëḱo vanë, rëḵ mu ham su newamin jaḵ in ngaa saga. Ham gwengo rë! Satan rëḵ naduu ham la na ḵarabus in

seggi ham. Lob ham rëk gwëko maggin los vanë noh vu buk nemadluho. Rëk mu ngo gwevong geving rot, bena berup doḵ buk sën genadiik lo, lob mëm sëḵ gevong madub nivesa vu hong. Madub saga og yik sën gemedo malam-tumsën degwata lo.

¹¹ Nebë saga, om nabë mehöti nenga neggëp, og gengo gagek sën Anon Vabuung nër vu Kerisi-yi-alam agi! Nabë mehöti kesuu ngaa maggin los ngaa nipaya pin, og diiksën sën netu luu lo su rëk natök vu yi rë, gaḵ rëk nama verök yi!”

Yesu Nër Gagek Raḵ Kerisi-yi-alam Vu Pergamum

¹² “Log kwevu gagek na vu Kerisi-yi-alam sën denedo Pergamum agu hir angër nabë:

Mehö sën paëp-yu-anil benevu malangeri genevu vahi vahi bevare nesoo loḵ avi lo, vong gagek sënë yök vu hong bë:

¹³ Serak hong nyëḡ ni bë Satan tu mehö-los-bengö benevong yi huk loḵ. Rëk genejom sarëḡ ahon niwëëk gayom neyam timu vu sa, gesu genelah sarëḡ vun rë. Yönon, wirek og Antipas nenër sa gagek rangah benedo ving ham. Yö nesepa loḵ sayeg yönon rot. Lob desiyi mediik loḵ hong nyëḡ sën Satan tu mehö-los-bengö benevong yi huk loḵ lo. Log loḵ buk sënë ving, og su gelah sarëḡ vun rë.

¹⁴ Rëk mu sa gagek la neggëp rak hong bë: Hong mehö la vu Pergamum denejom Balaam yi aggata ahon niwëëk. Balaam yi aggata lo nebë sënë: Tato aggata-tetuhinsën-yi vu Balak in bë tetuhin alam Israel begevong bengaa nipaya kepë sir. Lob Balak vong balam Israel degga reggu

sèn alam vahi denesis medetung tu seriveng vu anutu-kuungsèn lo, gevong bedenevong baggëb ving.

¹⁵ Log yik hong alam la ving denejom Nikolas yi alam hir gagek nipaya ahon niwëek rot.

¹⁶ Om gegwërin hong. Gaḵ nabë nama, og teka rëḵ sa hevongin nök vu hong begevong begö vu alam nijpaya saga jaḵ paëp-yu-anil sèn vare nesoo loḵ savig agi.

¹⁷ Om nabë mehöti nenga neggëp, og gengo gagek sèn Anon Vabuung nër vu Kerisi-yi-alam agi megero! Nabë mehöti kesuu ngaa maggin los ngaa nipaya pin, og sëḵ bo nos-yagek-yi sèn nahèn neggëp vunsèn gwëbeng agi vu yi, log sebo gelong veroo ti vu yi. Sa kevu ggev mewis raḵ gelong sënë, lob mehö ngwë su rëḵ jaḵ ggev sënë ni rë. Gaḵ yik mehöti sèn rëḵ geḵo gelong lo yö timu rëḵ jaḵ ni.”

Yesu Nër Gagek Raḵ Kerisi-yi-alam Vu Tuatira

¹⁸ “Log kwevu gagek na vu Kerisi-yi-alam vu Tuatira hir angër nabë:

Mehö sèn mala gahis netum niwëek ata nebë nengwah leleksèn, gevaha nebë braas beyö medo nepelibin lo vong gagek sënë yöḵ vu hong bë:

¹⁹ Serax ngaa pin sèn genevong lo ni. Serax ni bë ahëm neving alam, log ayom neyam timu vu sa, gegenevong huk pin in bë doḵ vu mehönon. Serax ni bë genare niwëek in maggin pin sèn netök vu hong lo. Serax aggata sèn genesepa loḵ mugin lo ni bë nivesa. Log sèn gwëbeng agi, og nivesa raḵ ya verök yi rot.

²⁰ Rĕk mu sa gagek sĕnĕ neggĕp rak hong bĕ: Genevong bavĕh ti nebĕ Yesebel nedo ving hong. Avĕh sĕnĕ nenĕr bĕ yi avĕh-nenĕr-gagek-rangahsĕn, rĕk mu ma genetahu sa hur lo bĕ de-sepa dok baggĕb, gedega reggu sĕn denetung netu seriveng vu anutu-kuungsĕn lo. Lob netetuhin sir rak ngaa nebĕ sĕnĕ.

²¹ Rĕk sa hevongin bĕ gĕrin yi, om sĕn sa nehalĕ yi mu genedo buk la, rĕk ma genilĕl bĕ su gĕrin yi begeruu demi vu yi baggĕb sĕnĕ rĕ.

²² Om gwengo rĕ! Sĕk gevong bavĕh sĕnĕ navi gesang rot, log ni jak bĕpata bena megĕp jak yi reek hus ading rot. Log maluh lo sĕn denevong baggĕb vu yi lo, nabĕ su degĕrin sir bedegeruu demij vu ngaa sĕn avĕh nevong lo rĕ, og sĕk bo vanĕ bĕpata los maggin vu sir.

²³ Log sengis nalu lo medenadiik geving. Sĕk gevong nabĕ sĕnĕ, lob mĕm Kerisi-yi-alam pin rĕk dejak ni nabĕ sa neseggi mehĕnon pin kwaj los ayoj menehero. Gedejak ni nabĕ sĕk bo nyĕvewen dok nah vu ham ti ti lo nirĕp noh vu ngaa sĕn ham nevong lo.

²⁴ Rĕk gwĕbeng sa bĕ nanĕr vu ham Tuatira vahi sĕn ham su nesepa lok gagek nipaya agi rĕ lo nabĕ: Ham su nesepa lok rĕ geham su kwamin netok rak ngaa sĕn denenĕr bĕ Satan yi gagek vunsĕn los degwa lo rĕ, om sa su rĕk gevong huk bĕp gwĕ vu ham rĕ.

²⁵ Rĕk ngaa nivesa pin sĕn ham nejom lo, og ham ngo najom ahon niwĕĕk rot bena berup dok buk sĕn sa natok nom lo.

²⁶ Nabĕ mehĕti kesuu ngaa maggin los ngaa nipaya pin, gesepa dok sa aggata rot bena berup

dok sĕn yi buk nama na lo, og sĕk gevong arĕ bĕp
vu yi benatu alam-yu-ngwĕ alaj—

27 ‘Lob rĕk najom aĕn dus ti begegin sir jak
nabĕ sĕn mehĕti sis dĕg sogek lob puvin teka
teka.’

Huk sĕn sevo vu yi agi, og yik nebĕ huk sĕn Amag
vo vu sa in bĕ sa gegin mehĕnon lo.

28 Lob sĕk bo betuheng Majelĕĕ vu yi,

29 om nabĕ mehĕti nenga neggĕp, og gengo
gagak sĕn Anon Vabuung nĕr vu Kerisi-yi-alam agi
megero!”

3

Yesu Nĕr Gagĕk Rak Kerisi-yi-alam Vu Sardis

1 “Log kwevu gagĕk na vu Kerisi-yi-alam sĕn
denedo Sardis agu hir angĕr nabĕ:

Mehĕ sĕn ko Anutu yi ngaahur nivesa
nemadvahi-bevidek-luu, gejom betuheng
nemadvahi-bevidek-luu lok nema lo vong
gagak sĕnĕ yĕk vu hong bĕ: Serak ngaa pin
sĕn genevong lo ni. Denenĕr hong bĕ: ‘Kerisi-
yi-alam yu ti sĕnĕ nedo mala-tumsĕn’, rĕk ma
gegetu heljĕng rak.

2 Om kwedi jak bemalam natum! Hong aggata
pin sĕn nahĕn neggĕp bevongin nadiik na lo, og
gebo gadu dok. In ngaa pin sĕn genevong lo, og sa
su halĕ ti meneggĕp nirĕp rot vu sa Anutu mala rĕ.

3 Wirek gengo Bengĕ Nivesa sĕnĕ, lob gĕko
yĕk vu hong ggovek ya los kwam vesa. Om
kwam bo nah gĕkin megenajom gagĕk saga ahon
begegwerin hong. Nabĕ su kwedi malam natum
rĕ, og sa hevongin natĕk nĕk vu hong nabĕ alam

sën deneyök hodek lo, log hong rëk dugin buk sën sêk natök nök vu hong lo.

⁴ Rëk mu hong alam Sardis la, og yö denahën denedo gesu denevong behir tob ningöhek neraç rë. Om sir sënë rëk dejöp tob veroo mewis behë los ana doç ti, in sir alam yohvu.

⁵ Nabë mehöti kesuu ngaa maggin los ngaa nipaya pin, og sêk jöp tob veroo nabë sënë doç yi, log sa su rëk jesöo arë na doç kapiya-malatum-sën-yi rë. Gak sêk nanër arë rangah jak Amag losho yi angër lo malaj.

⁶ Om nabë mehöti nenga neggëp, og gengo gägek sën Anon Vabuung nër vu Kerisi-yi-alam agi megero!”

Yesu Nër Gägek Raç Kerisi-yi-alam Vu Piladelpia

⁷ “Log kwevu gägek na vu Kerisi-yi-alam vu Piladelpia hir angër nabë:

Mehö vabuung sogek, sën nevong yoh vu yi gägek besu netetuhin rë lo, negin Davit yi kii sën Yerusalem mewis yi lo. Lob netahinin reping, gemehöti su yoh vu bë behii nah rë. Log nevehii reping, lob mehöti su yoh vu bë tahinin gökin rë. Mehö sënë vong gägek yök vu hong bë:

⁸ Serak ngaa pin sën genevong lo ni. Om gwelë rë. Sa hebë veluung avi meggëp netök loç malam, lob mehöti su yoh vu bë rëk behii nah rë. Serak ni bë nim wëek teka mu, rëk genesepa loç sa gägek, gesu geneloh sarëg vun rë.

⁹ Log geraç alam sën Satan yi alam sir agi nij bë denenër sir bë sirek alam Yuda. Rëk mu ma! Sir su Yuda rë. Gak sir alam gägek tetuhinsën. Om gwengo rë! Sêk gevong balam saga nam depetev

medegĕp dok malam, log dejak ni nabĕ sahĕg neving hong.

¹⁰ Ngo genesepa lok sa gagek, lob ngo genare niwĕĕk in ngaa maggin pin sĕn netok vu hong lo. Nebĕ saga, om sengo rĕk malagin hong rot, lob seggisĕn sĕn rĕk berup beseggi alam pin noh vu dob pin lo su rĕk natok vu hong rĕ.

¹¹ Sĕk natok nok vu hong pevis. Om ngaa sĕn geko vorot lo, og ngo pasang genapiik vu niwĕĕk. In tum rĕk degeko hong madub-kesuusĕn-yi vĕr medebo vu mehō ngwĕ.

¹² Nabĕ mehōti kesuu ngaa maggin los ngaa nipaya pin, og sĕk barah yi nabĕ mudeng in gadu sa Anutu yi dub vabuung ahon. Lob su rĕk gevuu dub vabuung gegeto menah dobnĕ gōkin rĕ. Gak rĕk nama verok yi. Sĕk kevuu sa Anutu arĕ jak yi, los sa kevuu sa Anutu yi nyĕg arĕ jak yi. Nyĕg bōp sagi og yik Yerusalem mewis sĕn sa Anutu rĕk gevong megevuu yagek geduk nam lo. Log sĕk kevuu sengo arĕg mewis jak yi geving.

¹³ Om nabĕ mehōti nenga neggĕp, og gengo gagek sĕn Anon Vabuung nĕr vu Kerisi-yi-alam agi megero!”

Yesu Nĕr Gagek Rak Kerisi-yi-alam Vu Laodisea

¹⁴ “Log kwevu gagek na vu Kerisi-yi-alam vu Laodisea hir angĕr nabĕ:

Mehō gagek anon degwa sĕn nenĕr Anutu yi gagek pin nirōp los nenĕr gagek yōnon mu yoh vu buk pin lo vong gagek sĕnĕ yōk vu hong. Ngaa pin sĕn Anutu tung lo degwa yi, benĕr bĕ:

15 Serak ngaa pin sèn genevong lo ni. Serak nim bē su ayom nikul* rē, gesu ayom niķerus rē. Gaķ bē mēm ngo gemedo nikul ma gemedo niķerus los dahis og mēm!

16 Rēķ ma gegenedo vuheng atov, geyiķ ayom niķerus mahen teka mu. Gaķ su ayom niķerus rot rē, gesu ayom nikul rot rē. Om sēķ namuteķ hong nom in aviķ.

17 Log genenēr nebē sēnē, ‘Sa monē ngahiseķē, gesa ngaa ngaa ngahiseķē nedo. Sa su naraķ vu in ngaa ti rē.’ Rēķ mu ma, gegenedo paya verōķ yi, beyoh vu bē alam kwaj paya in hong. Gerak vu in ngaanon rot, gemalam ķenod, gegenedo ahēm tōķsēn, gengō genedo dug dug in hong.

18 Nebē saga, om sebo kwa sēnē vu hong: Maķ mēm gebago goor sèn nengwah gga lob tu mewis bemalangeri raķ lo vu sa, lob mēm rēķ gegerek ngaanon-yageķ-yi. Log gebago tob veroo vu sa in kwebu navim jaķ, in su ahēm natōķ vu alam benim namum. Gegebago marasin vu sa in gwetung doķ malam, in malam natum begwelē nyēģ.

19 Nabē sahēģ neving alam, og sa navo gaģek raķ sir benesesor hir aggata. Om kwam bo hong beģewēr in hong yōnon.

20 Gwelē! Sa nare bayeg neraķ genavoseķ, om nabē mehōti gengō sayeg betateķ in ayo, og sēķ doķ na vu yi bemedo geving yi. Lob sēķ ga nos geving yi, gega nos geving sa.

21 Nabē mehōti kesuu ngaa maggin los ngaa nipaya pin, og sēķ ngoģekin yi bemedo geving sa

* **3:15:** Sèn nēr bē ayoj su nikul gesu niķerus rē lo, og nēr bē su denelēin Kerisi ya yōnon rē, gesu denepiķ vu yi yōnon rē, gaķ denedo vuheng atov.

jak sa sĕa-los-arĕ, nabĕ sĕn sa kĕsuu ngaa maggin los ngaa nipaya pin wirek, lob sa nado ving Amaĝ rak yi sĕa-los-arĕ agi.

²² Om nabĕ mehōti nenga neggĕp, og gengo gagek sĕn Anon Vabuung nĕr vu Kerisi-yi-alam agi megero!”

4

Denedudek Vu Anutu Vu Yagek

¹ Sĕnĕ ggovek, log sa halĕ veluung avi ti ggĕp netōk vu yagek. Lob mehōti sĕn sa hango aye wirek nebĕ avuuk nesu lo nĕr vu sa ggōkin bĕ, “Gejak nam vavunĕ sĕnĕ rĕ, loĝ mĕm sĕk tato ngaa pin sĕn rĕk natōk nam vu tamusĕn lo vu hong.”

² Lob Anon Vabuung verup ggĕrin sa niwĕĕk avuti, lob sa halĕ sĕa-los-arĕ ti nedo yagek, lob Mehō lo rak nedo sĕa sĕnĕ.

³ Sa halĕ Mehō sĕn nedo rak sĕa agi ni nebĕ gelōng sekwahek veroo malangeri los gelōng kōk rubi, log marubggii ti varah tetup loĝ yi sĕa, lob sa halĕ gemedo nepelibin nebĕ gelōng nimewis emeral.

⁴ Log sĕa-los-arĕ mehōdahis-bevidek-lubeluu nedo tetup loĝ sĕa-los-arĕ bōp sĕnĕ, lob alam ggev mehōdahis-bevidek-lubeluu rak denedo sĕa sagi. Ggev lo sĕnĕ derōp tob veroo, gedetung madub goor rak yuj.

⁵ Davĕs nevĕr rak sĕa-los-arĕ sĕnĕ menejĕh ya, log dedun nerak, gevakuvek netetap. Log detaggi dee nemadvahi-bevidek-luu mevare denetum lok sĕa sĕnĕ mala. Nengwah sĕnĕ og yik Anutu yi ngaahur nivesa nemadvahi-bevidek-luu.

⁶ Log ngaa ti nebë loo benedo loḵ sēa-los-arē sēnē mala. Ni nebë garas malangeri soḡek sēn denenēr arē nebë kristel lo bemala rangah rot.

Log ngaa lubeluu denedo malaj-tumsēn medenedo loḵ vuheng, lob detetup loḵ sēa-los-arē sēnē medenare, gemalaj ḡahis ngahiseḵē vunin malaj los yuj gemu.

⁷ Ngaa sēn nedo mala-tumsēn netu muginsēn ni nebë reggu bōp layon. Log ngaa sēn netu luu ni nebë burmakau maluh bōp ti. Log ngaa sēn netu lōō mala nebë mehōnon. Log ngaa netu lubeluu ni nebë tuḡ bōpata sēn nevēēng vavunē lo.

⁸ Ngaa lubeluu sēn denedo malaj vesa lo banisej nemadvahi bevidek ti ti yoh vu sir. Log malaj ḡahis ngahiseḵē nedo ggērin anoj pin gebanisej pin ving. Lob denevong raro buk gerangah bē:

“Niwēēk pin neggēp vu Mehōbōp Anutu. Yi mehō vabuung, yi mehō vabuung, yi mehō vabuung. Yō nedo wirek, benedo gwēbeng, gerēḵ nam.”

Gesu denesewah rē.

⁹ Ngaa la sēn denedo malaj-tumsēn agi, denenēr Mehō sēn nedo raḵ sēa-los-arē benedo mala-tumsēn degwata los degwata lo rangah. Log denēko arē raḵ, gedeneḡisek in yi, gayoj netee yi vu yi. Log yoh vu buk, og yiḵ ngaa lubeluu sēn denedo malaj-tumsēn agi denevong raro nebē sēnē.

¹⁰ Lob alam ggev mehōdahis-bevidek-lubeluu sēn denepetev medeneggēp loḵ Mehō sēn nedo raḵ sēa lo mala medeneḵo yi raḵ. In Mehō sēnē nedo degwata los degwata.

¹¹ Log denetē hir madub goor ya meto nedo loḵ mala, gedenenēr bē:

“Oo Mehöböp, he Anutu hong.
 Geyoh vu rot bë alam pin denanër nim wëëk
 rangah,
 los degeko arëm jak,
 gedegurek nim wëëk babu.
 In ngo getung ngaa pin.
 Ngo getung ngaa yoh vu kwam,
 lob anon rak,
 lob ngaa pin sagi nedo rot begwëbeng.”

5

Jon Lë Kapiya Ti Sën Dejegwi Rak Kele Niķegwi
 Bemir Rot*

¹ Log sa halë Mehö sën nedo rak sëa-los-arë lo jom kapiya ti loķ nema vesa, begagek neggëp rak vahi vahi. Log devevir bedemir rak kele niķegwi* loķ len nemadvahi-bevidek-luu, beķanak rak neggëp kele niķegwi*.

² Log sa halë angër los niwëëk ti genetahi böpata bë, “Mehö re yö nivesa rot, beyoh vu bë napuvin kele niķegwi* in kapiya sën agi gegepuh-a?”

³ Rëķ mehö ti su nivesa menedo yaķek, ma nedo dob, ma nedo dob gebinë, in bë gepuh kapiya sënë benatevin rë.

⁴ Sa halë gesu detöķ vu mehöti beyoh vu bë gepuh kapiya sënë genatevin rë. Lob sayog maggin besesu rot.

⁵ Rëķ ggev ti nër vu sa bë, “Su gengu! Gaķ gwengö rë! Reggu böp layon sën yi degwa vu Yuda geverup loķ Davit-yi-mewis nebë sën megen neggol loķ kele degwa lo nedo. Mehöti sënë kesuu Satan los ngaa dob yi pin. Om yi sënë yoh vu bë

rək napuvin kele niķegwi* nemadvahi-bevidek-luu sagi na in ƙapiya sēnē gegepuh.”

Jon Lē Sipsip Nalu

⁶ Log sa halē Sipsip Nalu ti nare, rək ni nebē sēn desis mediik tu seriveng. Nare loƙ sēa-los-arē sēnē gengaa lubeluu sēn denedo malaj-tumsēn agi losho alam ggev lo vuheng atov. Vis nemadvahi-bevidek-luu, gemala gahis nemadvahi-bevidek-luu. Mala gahis sagi og yik Anutu yi ngaahur nivesa nemadvahi-bevidek-luu sēn Anutu vong sir ya meyoh vu dob pin lo.

⁷ Lob mēm Sipsip Nalu sēnē ya meƙo ƙapiya sēnē loƙ Mehō sēn nedo raƙ sēa-los-arē lo nema vesa.

⁸ Ƙo ƙapiya sēnē ggovek ya, log ngaa lubeluu sēn denedo malaj-tumsēn agi losho alam ggev mehōdahis-bevidek-lubeluu sēnē depetev medeneggēp loƙ Sipsip Nalu mala. Alam ggev pin deƙo ngaa-sengii-yi ni nebē gita, los gabum goor yoh vu sir pin. Log kabang reggu nivesa pup gabum pin ayoj. Yik sēnēƙ Anutu-yi-alam hir jomraksēn.

⁹ Log devong raro mewis ti nebē:

“Geyoh vu rot bē gweƙo ƙapiya

begenapuvin kele niķegwi* sēn neggērin lo.

In desis hong megediik tu seriveng,

lob gebago mehōnon yom vu Anutu raƙ nim
ƙōƙ.

Yōnon, gebago alam loƙ mehōnon degwaj pin,

gelok ayej ti ti pin,

gelok dob ti ti pin.

¹⁰ Gegevong bedetu hil Anutu-yi-alam-deneƙo-seriveng

los detu yi alam-los-bengöj
in denatu ala bedegegin dob.”

Deko Sipsip Nalu Arë Rak

¹¹ Log sa malağ yah nelë, lob sa hango angër ngahisekë rot ayej. Sir ngahisekë rot nebë sën andet milion (100,000,000) gengahisekë rot rak neggëp mehömehö medenare tetup sëa-los-arë sënë gengaa la sën denedo malaj-tumsën lo los alam ggev.

¹² Log devong raro böpata bë:

“Sipsip Nalu sën desis mediik tu seriveng lo,
yoh vu rot bë geğo arë böpata rot,
gengaa nivesa vesa pin, gekwa nivesa, geni-
wëek böpata.

Yi yö yoh vu rot bë mehönon pin degeğo arë jağ,
gedenanër niwëek los arë böpata rangah,
gedenapisek in yi.”

¹³ Log sa hango ngaa aggagga pin sën Anutu tung lo ayej rak ving. Ngaa sën denevëeng ggëp yagek babu lo, gengaa sën deneyoh dob lo, gengaa sën deneggevek dob gebinë lo, gengaa sën deneggëp loğ loo lo, bayej rak medenër bë:

“Mehö sën nedo rak sëa-los-arë lo luho Sipsip Nalu,
hil gağo luho arëj jağ na vavunë, barëj böp rot,
genij kapiik los nij wëek gëp degwata los deg-
wata!”

¹⁴ Log ngaa lubeluu sën denedo malaj-tumsën lo deyogekin bë, “Yönon!” Lob alam ggev depetev medeneggëp loğ luho malaj medeneğo arëj rak.

6

Sipsip Nalu Puvin Kele Niķegwi Nemadvahi-bevidek-ti Vēr In Kapiya*

¹ Log sa halē Sipsip nalu nejom kapiya sēn kele niķegwi* nemadvahi-bevidek-luu jegwi ahon lo, lob puvin ti ya. Lob sa hango ngaa sēn denedo malaj-tumsēn lo ti vengwēng, lob aye vong bē vakuvek tetap, benēr bē, “Genam!”

² Log sa malag yah loķ pevis besa halē hoos veroo ti, lob mehōti sēn rak nedo lo ķo vasōl. Detung madub ti ni nebē madub sēn denevong vu alam sēn denevong begō medenekesuu lo rak yi. Log ya rak, lob vong begō mekesuu, lob yō arē in bē kesuu begō ngahiseķē.

³ Log Sipsip Nalu puvin kele niķegwi* sēn netu luu lo, lob sa hango ngaa sēn denedo malaj-tumsēn lo ngwē sēn netu luu lo nēr bē, “Genam!”

⁴ Lob hoos ngwē verup beniviis kōķ. Lob mehō sēn rak nedo lo ķo niwēēk bōpata rot in bē geķo mamer vēr in alam vu dob gedengis sir vewen vewen medenadiik. Nebē sēnē om devo paēp-yu-anil bōpata ti vu yi in bē gevong huk sēnē.

⁵ Log Sipsip Nalu puvin kele niķegwi* ngwē sēn netu lōō lo, lob sa hango ngaa sēn denedo malaj-tumsēn lo ti sēn netu lōō lo nēr bē, “Genam!” Lob sa malag yah loķ pevis besa halē hoos veriik ti. Lob mehō sēn rak nedo lo ķo ngaa veviisēn sēn hil galē maggin jak lo ti loķ nema.

⁶ Lob sa hango gageķ ti yam loķ ngaa lubeluu sēn denedo malaj-tumsēn agi vuheng benēr bē, “Gebago alam hir huk jak nos yō meris mu. Gw-evong nos wit* dēg mahen teka sēn noh vu buk

timu lo doḵ nah hir huk buk timu yi. Log gwevong nos barli* dëg mahen teka löö mu doḵ nah hir huk buk timu yi. Rëḵ mu su gebasap wël* sën denevesi nos raḵ lo los wain!”

⁷ Log Sipsip Nalu puvin kele niḵegwi* sën netu lubeluu lo, lob sa hangö ngaa sën denedo malaj-tumsën lo ti sën netu lubeluu lo nër bë, “Genam!”

⁸ Log sa malaḡ yah, lob sa pevis behalë hoos nisangsang ti. Log mehö sën raḵ nedo lo arë nebë Diiksën. Lob Alam-diiksën-hir-nyëḡ ketivin yi beneyam. Lob luho deḵo nij wëëḵ böpata rot yoh vu bë debasuh alam vu dob na yu lubeluu bedengis yu ti. Luho rëḵ dengis sir jaḵ begö mede-nadiik, gejaḵ meyip, gejaḵ niraksën aggagga, gejaḵ reggu bemën aggagga.

⁹ Log Sipsip Nalu puvin kele niḵegwi* sën netu nemadvahi lo, loḵ sa halë alam heljeng la anoj nedo Anutu yi jepö degwa. Alam sënë dejom Anutu yi gägeḵ ahon niwëëḵ wireḵ bedenener rangah, lob alam sën denelë sir paya lo desis sir medediik.

¹⁰ Lob anoj sënë denër böpata ya bë, “Oo Mehöböp sën getu he alamin lo, genedo vabuung, gehong aggata pin niröp rot! Nangërek rëḵ mëm gwevong gägeḵ vu mehönon pin sën denedo vu dob agi begebo doḵ nah he nimin köḵ vu sir-a?”

¹¹ Loḵ devo tob veroo ading loḵ yah sir ti ti, log denër vu sir bë, “Ham najom ham ahon be-medo dus teka geving rë. Gedengis ham vahi sën yik ham nevong huk timu lo los ham arimin sën Kerisi-yi-alam lo vahi geving nabë sën desis ham

* **6:6:** Nos mahen ti nebë padi los wit, rëḵ mu yö agga ngwë teka

agi. Balam sèn Anutu ggooin sir raḅ lo pin degovek na rë. Loḅ mèm Anutu rëḅ bo doḅ nah ham nimin köḅ.”

¹² Log Sipsip Nalu puvin kele niḱegwi* sèn netu nemadvahi-bevidek-ti lo, lob sa malag yah lok sa halë gejemapi böpata ggee raḅ dob. Log hes ggërin yi bemalakenu raḅ nebë sèn tob veriik. Log kwev mala köḅ loḅ los dahis nebë hil nid köḅ.

¹³ Log betuheng vu yaḱek depelubin medeyam dob nebë sèn sang neggee raḅ kele banon nerurin to lo.

¹⁴ Log yaḱek mala maya nebë sèn devevir kanyë in denaduu na. Log ḱedu pin los ḱedu loo vuheng devuu bej gedesejun medeneya.

¹⁵ Log alam-los-bengöj vu dob los alam böp böp, galam-begö-yi alaj sèn denegin sir lo, galam-los-bengöj ggoreksën, galam los nij wëëḱ, galam pin sèn alaj debaḱo sir medetu hir ngaa meris lo, galam pin sèn yö denegin sir lo, og sir pin devun sir medenedo loḅ waak jeggjin jeggjin vu dob gebinë, gedenedo loḅ peḱë len loḅ ḱedu babuj.

¹⁶ Lob denetahi vu ḱedu pin los gelöng bë, “Ham kwedub benam jaḱ medo he begwërin he in Mehö sèn raḅ nedo sëa-los-arë agu luho Sipsip Nalu, in luho ahëj sengën.

¹⁷ In luho hir buk böpata sèn ahëj sengën medebo doḅ nah ngaa nipaya nyëvewen lo gwëbeng töḱ yam ggovek ya, lob re yoh vu bë bare mekesuu ngaa sënë?”

7

Anutu Yi Alam Israel 144,000 Rëḅ Demedo

¹ Ngaa pin sĕnĕ ggovek, log sa halĕ angĕr lubeluu denare loḵ dob nenga lubeluu, bevare denejom dob yi sang lubeluu ahon in bĕ su degevĕ dob, ma degevĕ loo, ma degevĕ kele rĕ.

² Log sa halĕ angĕr ngwĕ vu sĕn hes mala neverup lo merak meyam. Ḷo Anutu sĕn nedo mala-tumsĕn lo yi ḵanak sepa, log tahi ya niwĕĕk vu angĕr lubeluu sĕn deḵo niwĕĕk bĕpata rot in debasap dob los loo lo bĕ,

³ “Ham su pevis megwevong paya vu dob, ma loo geḵele lu ngaa rĕ. Gaḵ he gĕbĕ he Anutu yi ḵanak jaḵ yi hur lo dabaj namugin rĕ, loḵ mĕm ham gwevong.”

⁴ Log sa hango alam sĕn denĕḵo ḵanak raḵ dabaj lo bĕ sir 144,000 deyam vu alam Israel degwaj pin.

⁵ Sir 12,000 vu Yuda yi mewis,
log sir 12,000 vu Ruben yi mewis,
log sir 12,000 vu Gat yi mewis,

⁶ log 12,000 vu Aser yi mewis,
log sir 12,000 vu Naptali yi mewis,
log sir 12,000 vu Manase yi mewis,

⁷ log sir 12,000 vu Simeon yi mewis,
log 12,000 vu Levi* yi mewis,
log sir 12,000 vu Isakar yi mewis,

⁸ log 12,000 vu Sebulun yi mewis,
log sir 12,000 vu Yosep yi mewis,
log sir 12,000 vu Benyamin yi mewis.

Besir pin deḵo Anutu yi ḵanak raḵ dabaj.

Alam Yu Bĕpata Rot Dejom Raḵ Vu Anutu

⁹ Ngaa pin sĕnĕ ggovek, log sa malaḡ yah. Lob sa halĕ alam ngahiseḵĕ rot desupin sir medenedo, rĕḵ mu mehĕti su yoh vu bĕ natevin sir rĕ. Alam

sĕnĕ deyam vu mehōnon pin, gedeyam vu dob pin, gevu mehōnon degwaj ti ti lo pin, gevu ayej agga ti ti lo pin. Beyam denare sĕa-los-arĕ mala ggĕp Sipsip Nalu mala. Derōp tob veroo adingsekĕ, gedekō kapah bĕk ris lok nemaj,

¹⁰ gedereseeh rur bĕ:

“Hil gako Anutu sĕn nedo rak sĕa-los-arĕ lo luho Sipsip Nalu arĕj jak.

In luho deko hil yom lob gwĕbeng hil nado nivesa!”

¹¹ Log angĕr pin denare tetup sĕa-los-arĕ los alam ggev losho ngaa lubeluu sĕn denedo malaj-tumsĕn lo ving. Lob depetev medeneggĕp lok luho malaj bedebĕ dabaj rak dob gedeneko Anutu arĕ rak

¹² medenenĕr bĕ:

“Yōnon rot!

Hil gako hil Anutu arĕ jak,

behil nanĕr niwĕĕk los arĕ bōpata rangah!

Kwa nivesa pin neggĕp vu yi,

lob hil kwad vesa vu yi behako arĕ rak!

Arĕ bōpata rot geyi Mehō niwĕĕk ata,

gengaa pin sĕnĕ yō neggĕp vu yi degwata los degwata!

Yōnon rot!”

Alam Sĕn Hir Nivanĕ Maya Gwĕbeng

¹³ Lob ggev ti lok tepĕk vu sa bĕ, “Alam sĕn derōp tob veroo agi mak sir re lo? Deyam vu tena?”

¹⁴ Lok senĕr yah vu yi nebĕ sĕnĕ bĕ, “Sa Mehōbōp, sak dugin. Gak mu mĕm hong mu ngo geraĕ ni.” Lok nĕr yom ggōkin vu sa bĕ, “Alam sĕnĕ deko maggin los vanĕ bōpata rĕk denare nij wĕĕk, om deripek hir tob lok Sipsip Nalu niĕkōk beveroo rak.

- 15 Nebě sĕnĕ,
om sĕn denare Anutu yi sĕa-los-arĕ mala.
Lob denevong tavĕ vu yi buk gerangah loḵ yi
dub vabuung.
Gemehö sĕn nedo raḵ sĕa-los-arĕ agi yö ti rĕḵ medo
geving sir megegin sir.
- 16 Su rĕḵ denadiikahĕj nah gökin rĕ,
gesu rĕḵ ayoj bev in bĕl nah gökin rĕ.
Hes su rĕḵ beek doḵ navij rĕ,
gengaa ti su rĕḵ bev jaḵ navij rĕ.
- 17 In Sipsip Nalu sĕn nedo raḵ sĕa-los-arĕ lo rĕḵ natu
hir mehö sĕn malain sir,
begeḵo sir na bĕl veyĕ bedenatum bĕl mala-
tumsĕn-yi.
Log Anutu rĕḵ jevu malaj bĕl,
gesu rĕḵ dengü nah gökin rĕ.”

8

Sipsip Nalu Puvin Kele Niḵegwi Sĕn Netu Nemadvahi-bevidek-luu*

¹ Log Sipsip Nalu puvin kele niḵegwi* sĕn netu nemadvahi bevidek luu lo, lob ngaa pin vu yagek deduj ma gesu denevengwĕng rĕ yoh vu awa nyĕngelĕ ma ngaa ti.

² Govek loḵ sa halĕ angĕr nemadvahi-bevidek-luu denare ggĕp Anutu mala, gedeneḵo avuuk nemadvahi-bevidek-luu loḵ nemaj yoh vu sir.

³ Log angĕr ti verup nare loḵ Anutu yi jepö degwa. Lob ḵo gabum goor gedevö kabang ngahiseḵĕ vu yi in besi seriveng bereggu nivesa berup na tagwaveḵ doḵ Anutu-yi-alam pin hir jomraḵsĕn. Besi seriveng jaḵ Anutu yi jepö sĕn

desemu raḵ goor yō meris menare loḵ Anutu yi sēa-los-arē mala lo, in reggu na.

⁴ Lob kabang aru reggu nivesa sēnē los Anutu-yi-alam hir jomraḵsēn pin devo sir vēr in angēr nema, gedeya vavunē beya deverup Anutu mala.

⁵ Loḵ angēr ḵo gabum-arū-reggu-nivesa-yi beḵo nengwah sēn ggēp neleleḵ lo vu jepō bepup gabum, log tē luḵ ya dob. Log pevis bevaḵuvek tetap bededun raḵ, lob davēs vēr meya, log jemapi ggeē.

Angēr Lubeluu Devē Avuuk

⁶ Lob angēr nemadvahi-bevidek-luu sēn deḵo avuuk nemadvahi-bevidek-luu lo dero sir in bē degevē.

⁷ Lob angēr muginsēn vē yi avuuk, lob hob lulanon los nengwah sarōmin yi ving ḵōḵ bekeseh luḵ ya dob. Lob devo den loḵ dob los ḵele ya yu löö, lob nengwah gga dob yu ti, geḵele yu ti. Log vos ris ni mewis pin, og nengwah gga ving.

⁸ Log angēr netu lūu vē yi avuuk lob nengwah böp ti nebē sēn ḵedu böp ti tum loḵ, beya meto meluḵ ya loo, lob vasuh loo ya löö. Ti ḵōḵ raḵ nebē mehōnon nij ḵōḵ geluu denedo nivesa.

⁹ Lob ngāa malaj vesa pin sēn deneggēp loḵ loo ḵōḵ agi dediik geyu lūu denedo nivesa. Log yaḡ pin ving nebē saga, yu ti ya devong paya geloo rehōö sir, geyu lūu denedo nivesa.

¹⁰ Log angēr sēn netu löö lo vē yi avuuk, lob betuheng böpata ti tum loḵ meluḵ vu yaḡek meya betum nebē dee sēn denetaggi lo, bevēs meya. Lob vasuh bēl pin vu dob ya yu löö. Vēs meto meluḵ ya

bël ata los bël veyë yu ti lob vong paya vu, geyu luu nahën denedo nivesa.

¹¹ Denenër betuheng sënë arë nebë Marasin Ni-mengëës, lob bël yu ti sagi ni mengëës rak. Lob alam ngahisekë sën denenum bël agi, og sis sir medediik ya.

¹² Log angër sën netu lubeluu lo vë yi avuuk, lob hes los kwev, gebetuheng pin devasuh sir ya len löö löö. Lob lej ti ti malaj kenu lok yoh vu sir gelej luu luu netum. Log devo den lok rangah ya löö ving. Lob len ti mala vahis lok ya verök yi gelen luu og rangah. Log buk len ti yik mala vahis lok nebë saga ving, gelen luu og betuheng los kwev denetum.

¹³ Log sa halë tug böpata ti nevëeng menyoh yagek babu. Lob sa hango ngeek bë, “Wöp-o! Wöp-o! Wöp-o! Gëpin alam sën denedo dob agi! In angër löö denahën bedenevongin bë degevë avuuk gemëm maggin natök nam vu mehönon!”

9

Angër Netu Nemadvahi Vë Avuuk

¹ Angër netu nemadvahi vë yi avuuk, lob sa halë gebetuheng ti kehulek vu yagek metök meyam dob. Lob devo kii asoreng böpata sën adingsekë rot lo yi vu yi.

² Tahinin asoreng sënë, lob aru rak verup nebë sën nengwah böpata ti aru. Lob aru sën rak verup asoreng agi bom hes los nyëg bemala vahis lok.

³ Lob gab ngahisekë nebë sepaak devo sir vër in aru sënë gedeluk ya dob. Lob nij wëek nebë veveeyagek böp nij wëek medenevong rii rak mehönon.

⁴ Rêk deko gagek bê su debasap vos ris ma ngaa nimewis aggagga sên nekip vu dob agi, ma kele ti rê. Gağ mêm dekevoh alam sên Anutu yi kanak su neggëp rağ dabaj rê lo na,

⁵ gedebö vanë vu sir nabë sên veveeyagek böp. Denegga mehõnon medenevo vanë vu sir lo noh vu kwev nemadvahi, rêk mu su dengis mehõnon medenadiik.

⁶ Doğ buk sênë og mehõnon rêk desero aggata diiksên yi, rêk nama gesu rêk denatök jak rê. Rêk ahëj geving nabë denadiik, rêk mu diiksên rêk beya in sir.

⁷ Sa halë sepaak lo nij nebë hoos sên denero in bê na degevong begö jak lo. Log detung ngaa ti nebë madub goor rağ yuj, log malaj nebë mehõnon malaj.

⁸ Log yuj belek ading nebë avëh yuj, genevuj nebë reggu böp layon nevuj.

⁹ Log devanuh aën ahë petes ggërin newaj nebë kelenavi, gebanisej nekelö böpata nebë sên hoos denedadii karis ngahisekë medeneserög medeneya begö lo.

¹⁰ Log husej nebë veveeyagek hus. Lob hir begö sên degelu mehõnon jak lo neggëp husej, om rêk degelu mehõnon jak noh vu kwev nemadvahi benavij gesang böpata.

¹¹ Hir mehõ-los-bengö og yik angër sên negin asoreng sên luk meya rot gahë degwa ma lo. Denenër angër sênë arë loğ Hibru ayej bê Abadon, geGrik ayej nebë Apolyon. Log hil pekwë doğ ayed nabë Mehõ-kevohsên-ngaa-pin.

¹² Maggin böp muginsên yi ggovek ya, geham gwengö rê! Maggin luu nahën neggëp bevongin

natök nam.

Angër Netu Videk-ti Vë Avuuk

¹³ Log angër netu videk-ti vë yi avuuk, lob sa hango mehōti aye yam loḵ vis lubeluu sën denedo jepō goor nyëketu lubeluu benedo loḵ Anutu mala lo.

¹⁴ Benër yam vu angër sën nejom avuuk netu videk-ti lo bē, “Kwevelekin angër lubeluu sën deduu sir raḵ sēng medenedo bël ata Yupretis lo vër medena.”

¹⁵ Lob kevelekin angër lubeluu sënë vër in bē na debasuh mehōnon na yu löö, lob dengis yu ti medenadiik. Detung angër lo sënë wirek, bemedo denegin hes mala sënë los buk sënë, gekwev sënë, geyik ta sënë, in bē degevong hir huk sënë.

¹⁶ Lob sa hango bē hir alam-begō-yi sën deneraḵ hoos lo sir yoh vu 200 milion.

¹⁷ Lob sa nig nebë sën sa pesep behalë hoos lo sënë los alam sën deneraḵ lo. Deröp ngaa nebë kelenavi ggërin newaj, benikök nebë nengwah leleksën, geniraru nebë yagek, genisangsang nebë ahok kedë. Geyuj nebë reggu böp layon. Lob nengwah daggen los aru, gegelöng salpa* sën netum lo, raḵ verup avij begelu yi meya.

¹⁸ Lob desis mehōnon sën devasuh raḵ yu löö lo yu ti raḵ ngaa nipaya löö sënë medediik. Yik nengwah daggen los aru ga, gelöng salpa* sën tum berak deverup hoos avij lo.

¹⁹ Hoos sënë nij wëek neggëp ggëp avij los husej. Husej nebë nyël geyuj neggëp medenegga mehōnon raḵ.

²⁰ Rëḵ mu mehōnon vahi pin sën su dediik raḵ ngaa nipaya löö agi rë lo, og su deggërin sir

bederuu demij vu ngaa sèn denesemu rak nemaj lo rë. Yönon, su denevuu sèn denedudek vu memö los anutu-kuungsën sën yö denesemu rak goor los seriva, gebraas los gelöng, gekele lo rë. Ngaa sënë su deyoh vu bë degelë nyëg los degengo gagek, gedena rë.

²¹ Log mehönon vahi sënë denesis mehö la medenediik, gedenevong parahek, gedenevong baggëb, gedenevongodek ngaa jeggjin jeggjin, rëk su deggërin sir mederuu demij vu ngaa sënë ving rë.

10

Angër Vo Kapiya MeJon Gga

¹ Sënë ggovek, log sa halë angër niwëek ata ti luk vu yagek meyam. Bom yi lok beggob, gemarubgii buu lok yu. Log mala netum nebë hes, gevaha netum nebë mudeng sën nengwah gga bemedo netum rak lo.

² Jom kapiya mahen teka lok nema, lob puh yi beneggëp. Log varah vaha vesa rak loo gevaha kěj nare rak dob.

³ Log vong aye böpata nebë sën reggu böp layon nengeek lo, log vakuvek nemadvahi-bevidek-luu detetap bedevengwëng lok yö ayej.

⁴ Vakuvek nemadvahi-bevidek-luu sënë devengwëng ggovek, lob sa hevongin bë kevu ayej sënë. Rëk sa hangö mehöti nër aye yam vu yagek bë, “Vakuvek nemadvahi-bevidek-luu sën detetap lo hir gagek, og genajom ahon meyö gëp dok yum mu, gak su gekwevu!”

⁵ Log angër sën sa halë genare rak loo los dob lo, varah nema vesa rak ya yagek,

⁶ genēr yōnon vavunē raḵ Anutu sēn nedo mala-tumsēn degwata los degwata lo arē. Yīḵ Anutu sēnē sēn tung yaḡek los ngāa pin sēn denedo loḵ lo, getung dob los ngāa pin sēn denedo loḵ lo, getung loo los ngāa pin sēn deneggēp loḵ lo. Log angēr nēr bē, “Buk vongin govek na pehi sēnē. Anutu su rēḵ gēgin nah gökin rē.

⁷ Gaḵ nabē angēr netu nemadvahi-bevidek-luu gevē avuuk jaḵ gēp hus baye jaḵ, og Anutu rēḵ gevong beyi ngāa sēn neggēp vunsēn wirek lo anon jaḵ. Nabē sēn nēr loḵ Bengō Nivesa sēn vo vu yi hur-denenēr-ḡaḡek-rangahsēn lo wirek lo.”

⁸ Log mehō sēn aye yam vu yaḡek mesa hango lo, nēr vu sa ggōkin bē, “Gena gwēko ḵapiya sēn yō puh yi meneggēp loḵ angēr sēn nare raḵ loo los dob lo nema.”

⁹ Lob seya vu angēr mesenēr vu bē, “Gebo ḵapiya mahen teka saga vu sa.” Loḵ nēr vu sa bē, “Gwēko nōk begegwa. Saga rēḵ nengēn rot vu avim nabē beggoh. Rēḵ mu ahēm ḵevus og rēḵ mengēēs vu.”

¹⁰ Angēr nēr ggovek, log sa haḵo ḵapiya mahen teka sēnē vēr loḵ nema beha. Lob nengēn rot loḵ saviḡ nebē beggoh. Loḵ tum sa hengon ya, lob nimengēēs rot vu sahēḡ ḵevus.

¹¹ Lob denēr vu sa bē, “Genanēr Anutu yi ḡaḡek rangah nah gökin jaḵ ngāa sēn rēḵ natōḵ vu alam ngahiseḵē vu dob ngahiseḵē, gayej ngahiseḵē, gevu alam-los-bengōj ngahiseḵē geving lo.”

11

Mehō Luu Denēr Ḡaḡek

¹ Devo ngesing ti ni nebĕ atoheng vu sa in bĕ sa tahöo ngaa jak, gedenĕr vu sa bĕ, “Kwedi getahöo Anutu yi dub-vabuung-böp ayo vabuung los jepö, gegenatevin alam sĕn denesupin sir loḵ lo geving.

² Rĕḵ mu dub-vabuung-böp yi telig sĕn neyom dobnĕ lo, og su getahöo, gaḵ gwevuu menök gĕp. In telig sagak alam dahis hir ngaa, om rĕḵ debarah vahaj doḵ nyĕḡ vabuung böp Yerusalem na menoh vu kwev mehödahis-luu-bevidek-luu.

³ Lob sĕḵ bo niwĕĕk böpata rot vu mehö luu, gegevong luho na denanĕr sa gägek rangah. Luho rĕḵ degevĕh bĕĕk nabĕ tob, in detato vu alam nabĕ degĕrin sir nah vu Anutu log denanĕr sa gägek rangah noh vu buk sĕn 1,260 agi.”

⁴ Luho nebĕ kele oliv* vaha luu. Log luho nebĕ ram luu bedenare loḵ alam pin vu dob hir Mehöböp mala.

⁵ Nabĕ mehö la degevongin nabĕ degevong paya vu luho, og nengwah rĕḵ jak berup luho avij bega sir sĕn denelĕ luho paya lo. Yönon rot, mehöti bĕ gevongin nabĕ kevoh luho na, og rĕḵ nadiik jak ngaa sĕnĕ.

⁶ Luho nij wĕĕk böpata rot neggĕp beyoh vu bĕ degĕrin yaḡek gehob nama noh vu buk sĕn luho denanĕr Anutu yi gägek rangah lo. Log luho nij wĕĕk böpata rot neggĕp beyoh vu bĕ depekwĕ bĕl pin natu köḵ nabĕ mehönon nij köḵ, gedebasap alam vu dob jak ngaa nipaya aggagga. Noh vu buk pin sĕn nabĕ luho kwaj bo nabĕ degevong lo, og luho deyoh vu bĕ degevong.

⁷ Luho degovek huk sĕn denanĕr Anutu yi gägek rangah agi na, log mĕm reggu bemĕn böpata ti rĕḵ vu asoreng sĕn luḵ ya rot gahĕ degwa ma lo, mejak

nam vavunē belööho dengis sir. Lob rēk kesuu luho bengis luho beluho denadiik.

⁸ Lob luho navij rēk doḡ gēp nyēg böp sēn hil nepeggirin gāgek raḡ bē Sodom los Ejep lo yi aggata böp. Yik nyēg böp saga sēn desis luho hir Mehöböp raḡ kelepeḡo* loḡ wirek mediik lo.

⁹ Alam la rēk vu navij agga ti ti pin, gevu mehōnon degwaj pin, gevu ayej agga ti ti pin, gevu dob pin, berēk degelē luho nij hel gēp noh vu buk löö benyēngelē. Log su rēk dengogekin mehō la bededev luho nij hel rē.

¹⁰ Lob alam vu dob sēnē rēk kwaj vesa in luho dediik, lob rēk dedöo gedega nos böp, gedebokūpek nyēmasēn vu sir vewen vewen. In alam-deneñer-gāgek-rangahsēn luu sēnē denevo vanē pangsēn rot vu alam pin vu dob wirek.

¹¹ Lob buk löö benyēngelē ggovek ya, loḡ Anutu vong saheng mala-tumsēn-yi loḡ ya luho ayoj. Lob luho dekedi raḡ bedenare. Lob mehōnon sēn delē luho lo kenuj verup bedeggöneng böpata rot.

¹² Lob kööḡ niwēek ti yam vu yāgek vu luho bedengo bē, “Melu jaḡ nam vavunē sēnē.” Lob beggob ḡo luho merāḡ ya yāgek galam sēn denesis begō vu luho lo, delē bē luho derāḡ medeya.

¹³ Log pevis bejemapi ggee böpata, lob nyēg böp saga len ti mala ma, geyik len nemadvahibevidek-lubeluu nahēn denedo. Lob jemapi sēnē sis alam 7,000 medediik. Galam vahi sēn nahēn denedo vesaj lo deggöneng böpata rot bedeko Anutu sēn yāgek ala lo arē raḡ.

¹⁴ Maggin böp netu luu sēnē ggovek ya. Geham gwengo rē! Buk su rēk hus ading rē, gaḡ maggin netu löö yik vongin berup pevis.

Angër Netu Nemadvahi-bevidek-luu Vë Avuuk

¹⁵ Log angër netu nemadvahi-bevidek-luu vë yi avuuk, lob mehö la ayej raḵ vu yagek medetahi niwëëk bë:

“Hil Mehöböḵ tu dob pin hir Mehö-los-bengö ggovek ya,
geyi mehö sën ggooin raḵ in bë geḵo hil nah lo
tu Mehö-los-bengö ving nebë saga,
berëḵ medo gegin mehönon pin degwata los
degwata!”

¹⁶ Lob alam ggev mehödahis-bevidek-lubeluu sën denedo rak hir sëa loḵ Anutu mala lo depetev medeneggëḵ loḵ Anutu mala bedepeḵa dabaj raḵ dob gedeko yi raḵ niwëëk,

¹⁷ medenër bë:

“Oo Mehöböḵ Anutu, niwëëk pin neggëḵ vu hong.
Genedo gwëbeng, genḵo genedo yö vu
muginsën.

Geḵo nim wëëk böpata ggovek ya,
begetu mehönon pin alaj vorot bemedo
genëgin sir.

¹⁸ Alam dahis pin ahëj sengën, rëḵ gwëbeng,
og ahëm sengën töḵ yam rangah ggovek ya.
Log buk sën alam-diiksën denatöḵ nam rangah
megwengo hir gägek lo yik sënë.

Gebuk gwëbeng sënë, sën gebo nivesa
nyëvewen vu hong hur alam-denenër-
gägek-rangahsën lo,
gevu hong alam lo,
gevu alam pin sën deneggöneng gedeneg-
gurek babum lo.

Kë! Sir sën yuj ading lo, gesir sën alam meris lo
ving.

Buk yam ggovek ya in bē gekwevoh alam sēn denevasap ngaa vu dob lo na!”

¹⁹ Denēr ggovek, log Anutu yi dub vabuung sēn nedo yagek lo tatekin yi, log kerōng-horek-yi nedo rangah loḵ ayo vabuung sogek. Yiḵ kerōng sagi sēn Anutu joo gāgek vu alam Israel wirek meneggēp loḵ lo. Lob davēs vēr behang meya, log dedun raḵ, lob vaḵuvek tetap gedob lōngin, log hob lulanon lev ata.

12

Avēh Luho Ngaa Bōpata Ti Nebē Ḷarob

¹ Lob ngaa tahutahu-yi bōp ti tōḵ yam rangah ggēp yagek, nebē sēnē: Avēh ti nedo, berōp hes mala loḵ navi nebē tob gerak nare kwev. Log tung betuheng nemadluho-bevidek-luu raḵ yu nebē madub.

² Log nalu loḵ, lob medo nevimeng in bē geko, rēḵ vanē nevev raḵ yi pangsēn rot.

³ Log ngaa tahutahu-yi ngwē tōḵ yam rangah ggēp yagek. Ngaa sagi nebē sēnē: Ḷarob bōpata ti neggēp. Navi ḵōḵ geyu nemadvahi-bevidek-luu, gevis nemadluho. Lob tung mehō-los-bengō yi madub nemadvahi-bevidek-luu raḵ yu pin.

⁴ Log hus sekee betuheng yu ti vu yagek betē yam dob. Geyiḵ betuheng yu luu mu nedo yagek. Log ḵarob bōpata sēnē ya nare loḵ avēh sēn nevimeng lo mala, in bē geḵo nalu geto lob ga.

⁵ Lob avēh ḵo nalu maluh. Hur mahen sagi sēn rēḵ najom aēn dus ti megegin mehōnon pin jaḵ lo. Lob avēh ḵo nalu ggovek, lob deḵo raḵ ya vavunē pevis, bedēḵo ya vu Anutu los yi sēa-los-arē,

⁶ log avĕh sĕnĕ vĕya meya nyĕg-yumeris. Anutu ro yi nyĕg vu sagu in bĕ degegin yi bedebo nos vu yi noh vu buk 1,260 sagi.

⁷ Lok begö böpata verup vu yaĕk. Angĕr hir ggev Mikael losho yi angĕr vahi devong begö vu karob böp, om karob böp losho yi angĕr lo denevong begö lok yah vu sir.

⁸ Rĕk mu Mikael losho yi angĕr dekesuu sir medetii sir ya in yaĕk.

⁹ Karob böpata sĕnĕ luk yam dob, yik marub sĕn yö neggĕp vu nyĕdahis lo lob denenĕr arĕ nebĕ Memö Nipaya, geSatan. Sĕn netetuhin mehönnon pin vu dob lo. Detĕ yi ya dob lob detĕ yi angĕr lo ya ving yi.

¹⁰ Lob sa hango mehöti tahi niwĕĕk yam vu yaĕk bĕ:

“Gwĕbeng hil Anutu ko hil yom ggovek ya,
geniwĕĕk tök yam rangah ggovek betu mehö-
los-bengö in gegin mehönnon!

Log yi mehö sĕn ggooin rak in bĕ geĕo hil nah lo
arĕ böp rak!

In mehö sĕn nenĕr gagek rak hil arid lo sĕn Kerisi-
yi-alam sir lo,
nenĕr gagek rak sir vu hil Anutu buk
gerangah.

Rĕk gwĕbeng angĕr lo detĕ yi ya dob ggovek ya.

¹¹ Ngaa sĕn vong bedekesuu yi lo yik rak sĕn Sipsip
Nalu nikök keseh lo,
log rak sĕn denenĕr Yesu yi gagek rangah lo,
log rak sĕn su kwaj nevo navij pangsen bĕ
demedo nivesa vu dob sĕnĕ rĕ lo.

Su kwaj nevo sir rĕ,

gaḵ bē alam dengis sir medenadiiḵ og yiḵ ggovek.

12 Nebē sēnē om ham pin sēn nedo yaḡek lo, ham kwamin vesa!

Rēḵ mu ham sēn nedo dob los loo lo, ham gwegin ham!

In maggin böpata vongin natōḵ vu ham.

Satan luḵ yōḵ vu ham ggovek ya,

lob ahē sengēn böpata rot,

in raḵ ni bē yiḵ hen buk hus dus teka mu.”

13 Ḳarob böpata sēnē lē bē detē yi ya dob, lob tii avēh sēn ḵol nalu maluh lo besepa rot.

14 Rēḵ mu devo tuḡ banis böpata luu vu avēh sēnē in bē gevēng mena ben nyēḡ-yumeris, bena medo ading in marub böp saga. Gerēḵ degegin yi nivesa in nos vu sagu noh vu nḡebek löö benyēngelē saga, (yiḵ buk 1,260 sēn lo).

15 Lob marub sēnē mutēḵ bēl verup avi bevaar meya nebē bēl ata betamuin avēh meya. Marub vongin bē bēl geḵo avēh sēnē na bemala nama.

16 Rēḵ dob loḵ vu avēh bavi tōḵ gengen bēl sēn ḵarob mutēḵ verup avi lo.

17-18 Lob ḵarob böpata sēnē ahē sengēn rot vu avēh, lob ya in bē gevong begō vu avēh nalu lo vahi. Sir sēnē denesepa loḵ Anutu yi horek medenetateḵin Yesu yi Bengō Nivesa rangah.

13

¹ Log yō nare raḵ raggēr vu loo nenga.

Reggu Bemēn Böp Luu Deverup

Lob sa halē reggu bemēn böp ti raḵ verup loo. Yu nemadvahi-bevidek-luu gevis nemadluho. (Vis nebē burmakau). Lob alam-los-bengōj hir madub

nemadluho nedo rak yoh vu vis pin. Log ngaa la arëj rak neggëp yu. Arëj sënë og gagek pelësën aggagga sën nerak Anutu lo.

² Reggu bemën sën sa halë agi ni nebë reggu böp lepat, gevaha nebë reggu böp bëa vaha, gavi nebë reggu böp layon avi. Lob karob sën lo vo yi niwëek vu reggu bemën sënë. Lob tung yi tu mehō-los-bengō nebë yi, lob vo niwëek böpata rot vu yi.

³ Lob sa halë bë reggu bemën yu lo ti vong bë degelu bebegō niben neggëp rak. Niben böpata beyoh vu bë nadiik, rëk ma gebegō nyë sënë ggov ya geniben mu neggëp. Lob alam pin kenuj ya in ngaa sënë, lob desepa loḵ yi.

⁴ Denepetev medeneggëp loḵ karob böp sënë lo mala medeneko yi rak, in vo yi niwëek vu reggu bemën sënë. Gedenepetev medeneggëp vu reggu bemën sënë ving, gedenenër bë, “Maḵ re luho reggu bemën sënë deneggëp ti? Maḵ re yoh vu bë gevong begō mekesuu yi?”

⁵ Rëk Anutu lë reggu bemëm böp sënë mu, geyō medo nevong paang menenër pelë rak yi. Geniwëek böpata rot neggëp in gevong ngaa pin sën kwa nevo lo noh vu kwev mehōdahis-luu-bevidek-luu (yik buk 1,260 sën lo).

⁶ Yō avi rak benër pelë rak Anutu. Genër pelë rak Anutu arë, genër pelë rak yi dub-vabuung-böp, gerak yi alam sën denedo yagek lo.

⁷ Lob Anutu lë yi mu, geyō vong begō vu Anutu-yi-alam beniwëek mekesuu sir bedahun sir ya. Log ḵo niwëek böpata rot yoh vu bë natu alam pin, gedob pin, gayej pin, genavij aggagga pin, hir mehō-los-bengō.

⁸ Mehōnon pin vu dob sën su arëj neggëp loḵ

ƙapiya vu buk sĕn Anutu tung dob rĕ lo, og rĕƙ degeƙo reggu bemĕn sĕnĕ jak. Ƙapiya sĕnĕƙ Sipsip Nalu sĕn desis yi mediik wirek lo yi ƙapiya mala-tumsĕn-yi.

⁹ Mehōti bĕ nenga neggĕp, og gengo gagek sĕnĕ nivesa megero!

¹⁰ Nabĕ mehōti arĕ neggĕp bĕ na ƙarabus, og rĕƙ na.

Log nabĕ mehōti arĕ neggĕp bĕ dengis yi jak paĕp-yu-anil menadiik,
og rĕƙ dengis yi menadiik.

Om Anutu-yi-alam denajom sir ahon rot medekerĕ, gayoj na timu vu Kerisi.

¹¹ Log sa halĕ reggu bemĕn bōp ngwĕ kedi loƙ dob gebinĕ merak verup. Vis luu nedo rak yu nebĕ sĕn sipsip tuveƙ ti, rĕƙ nengeek aye bōp nebĕ ƙarob bōpata ti.

¹² Reggu bōp netu luu sĕnĕ tu reggu nipaya muginsĕn yi hur beko yi niwĕĕk bōpata pin, benevong bemehōnon los ngaa-dob-yi pin deneko reggu muginsĕn sĕnĕ rak. Yi sĕn wirek begō nyĕ bōpata neggĕp rak yu beyoh vu bĕ gevong menadiik, rĕƙ ma geggov ya in yi lo.

¹³ Reggu bemĕn ngwĕ sĕn netu luu nevong ngaa bōp aggagga, lob vong ngaa bōp ti nebĕ sĕnĕ: Vong benengwah luƙ vu yagek meyam dob rak alam malaj medelĕ.

¹⁴ Rĕƙ Anutu lĕ yi mu, genevong ngaa bōp aggagga ggĕp reggu bemĕn ngwĕ muginsĕn mala, lob netetuhin mehōnon vu dob sĕnĕ rak ngaa bōp bōp nebĕ sĕnĕ. Log loƙ ahĕj menĕr bĕ desemu reggu bemĕn muginsĕn ƙenu ti in degeƙo arĕ jak. Reggu

bemën böp sagi sën paëp-yu-anil sis yi wirek, rëk ma genahën nedo vesa lo.

¹⁵ Lob Anutu lë yi mu, gereggu bemën sën netu luu lo rov saheng lok ya reggu bemën ngwë muginsën kenu bevesa lok, benevengwëng. Gak nabë mehö la su degekö reggu bemën ngwë muginsën sënë jak rë, og rëk ngis sir medenadiik.

¹⁶ Log reggu bemën sën netu luu lo nër, lob debë kanak ti rak alam pin nemaj vesa ma dabaj. Debë rak alam-meris los alam-yuj-ading, galam-ggoreksën los alam-kupek-masën, galam sën alaj debago sir tu hir ngaa meris lo los alam sën yö denegin sir lo.

¹⁷ Om nabë mehöti su geko reggu bemën sënë arë, ma yi kanak, jak gëp yi rë, og su yoh vu bë rëk bago alam hir ngaa ti rë. Gesu yoh vu bë alam debago hen ngaa ti rë.

¹⁸ Gagek sënë degwa neggëp, om ham sën los kwamin lo, og ham kwamin bo reggu bemën yi kanak sënë nivesa mejak ni. In yik kanak sënë og mehönon ti arë neggëp vunsën lok, lob yik nebë sënë: 666.

14

Sir 144,000 Devong Raro Mewis

¹ Log sa malag yah, lob sa halë Sipsip Nalu nare rak kedu Sion*, balam 144,000 denare ving yi. Lob Sipsip Nalu luho Ama arëj neggëp rak sir pin dabaj.

² Log sa hangö dedun nivesa yam vu yagek. Dedun nebë sën lubek böp nevo dedun, genebë sën vakuvek netetap bededun böpata. Sa hangö dedun

sĕnĕ vong bĕ sĕn sengii aye nivesa, bevong bĕ sĕn alam denesis gita baye nivesa verup.

³ Devong raro mewis ti rak, rak Anutu yi sĕa-los-arĕ mala, gerak ngaa lubeluu sĕn denedo malaj-tumsĕn lo malaj, gerak alam ggev malaj. Anutu bago alam 144,000 sĕnĕ vu dob yom, lob sir sĕnĕ mu deyoh vu bĕ dejak raro sĕnĕ ni. Gaḡ alam vahi og su deyoh vu rĕ.

⁴ Alam sĕnĕ og yĕ deleḡin sir nivesa medenedo maluh bu gavĕh ma. Alam sĕnĕ medo denesepa Sipsip Nalu medeneya ving yi yoh vu nyĕḡ sĕn neya lo. Anutu ggooin sir rak lok alam vu dob ayo vuheng gebago sir yom in bĕ denatu alam muginsĕn medenatu seriveng vu Anutu, om sĕn ḡo sir yah tu luho Sipsip Nalu yĕ hir ngaa.

⁵ Vu buk sĕn denedo dob lo, og su denenĕr gagek tetuhinsĕn rĕ, gesu denevong ngaa ti paya meneggĕp vu sir rĕ.

Angĕr Lĕo Denĕr Gagek

⁶ Log sa halĕ angĕr ti genevĕĕng meneya yagek babu vavunĕ rot. Ḳo Bengĕ Nivesa sĕn neggĕp degwata los degwata lo. Lob yi huk bĕ tateḡin Bengĕ Nivesa sĕnĕ vu alam pin sĕn denedo dob agi, genanĕr vu mehĕnon pin sĕn denedo vu dob pin, genavij agga ti ti pin, gayej ti ti pin, gemehĕnon degwaj pin lo.

⁷ Tahĭ niwĕĕk bĕ, “Buk tĕḡ yam ggovek ya in Anutu seggi mehĕnon hir gagek. Om ham ḡĕnengin yi gegweḡo arĕ jak. Ham gwĕḡo Mehĕ sĕn tung yagek los dob, geloo los bĕl veyĕ pin lo arĕ jak.”

⁸ Angĕr ngwĕ tamuĭn ngwĕ muginsĕn beyam. Lob angĕr ngwĕ sĕn netu luu agi tahĭ bĕ, “Babu-

lon* böp bumeng ya! Bumeng ya! Vong bē nyög böp Babulon* vo wain niwëek vu alam vu dob pin medenenum. Vong besir ngahisekë desepa loḵ yi baggëb lu ngaa bedenevong niwëek ata beggërin ayoj.”

⁹ Loḵ tum angër ti tamuın luho beberup. Lob angër netu löö sënë tahi ya niwëek bē, “Nabē mehōti nadudeḵ vu reggu bemën sënë ma ḵenu, ma gebē yi ḵanaḵ jaḵ daba ma nema,

¹⁰ og rëḵ nanum wain ti. Wain sënë yik Anutu ahē sengën, rëḵ mu Anutu su rëḵ sarömin bël geving wain sënë rë. Gaḵ yö rëḵ keseh ahē sengën doḵ kap in bo doḵ nah nipaya nyëvewen, bemehōti sën lo nanum. Lob rëḵ geko vanē nipaya rot jaḵ nengwah niḵerus sën medo netum raḵ gelöng nisangsang salpa* lo, jaḵ angër vabuung lo malaj, gejaḵ Sipsip Nalu mala.

¹¹ Lob aru rëḵ jaḵ berup nengwah sën nevo vanē vu sir agi, berëḵ berup medo mena vavunë degwata los degwata. Alam sën deneko reggu bemën los ḵenu raḵ, gedeneḵo yi ḵanaḵ raḵ neggëp sir lo, og su deyoh vu bē rëḵ desewah rangah los buk rë.”

¹² Om Anutu-yi-alam denajom sir ahon medebare niwëek, medesepa doḵ Anutu yi horek, gayoj na timu vu Yesu medemedo.

¹³ Log sa hango mehōti aye yam vu yaḡek menër bē, “Kwevu gaḡek nabē sënë: ‘Alam sën degevong geving Mehöböp loḵ denadiik lo, og kwaj vesa!’” Log Anon Vabuung nër ving bē, “Yönon, kwaj vesa in rëḵ degevu huk ḵerus ḵerus sën denevong agi na gedesewah. In su rëḵ dena meris rë, gaḵ ngaa nivesa sën devong lo rëḵ na geving sir.”

Buk Sën Dengupin Mehönon In Bë Degeko Nyëvewen Doḵ Nah Hir Huk Lo

¹⁴ Log sa malaḡ yah, lob sa halë beggob veroo ti nedo, lob mehöti rak nedo beggob sënë vavunë. Ni nebë Mehönon Nalu, getung madub goor raḡ yu, log kii loḡ nema.

¹⁵ Log angër ngwë vu dub-vabuung-böp sën nedo yaḡek lo meluḡ yam. Lob tahi ya niwëëk vu mehö sën raḡ nedo beggob vavunë lo bë, “Gebo nos jaḡ hong paëp babasën! Nos pin vu dob anon loḡ ggovek ya! Om vosën anon yi buk gwëbeng sënë!”

¹⁶ Lob mehö sën nedo raḡ beggob lo jom yi paëp babasën raḡ bekesik ya dob, bekesik nos sën anon loḡ vu dob lo.

¹⁷ Log tum angër ngwë luḡ vu dub-vabuung-böp sën nedo yaḡek lo, beḡo paëp babasën nevu malangeri ti ving.

¹⁸ Log angër ti sën negin nengwah raḡ jepö lo tah yi vër in jepö beyam. Lob tahi ya niwëëk vu angër sën ḡo paëp babasën nevu malangeri ngwë lo bë, “Gweḡo hong paëp babasën sën nevu malangeri rot aga, begena gwelov wain anon ḡod vu dob, begengupin bemedo! In anon pin moneḡ ggovek ya!”

¹⁹ Lob angër sënë ḡo yi paëp babasën raḡ bekesik ya dob, lob lov wain anon ḡod pin besupin menedo. Lob të wain anon sënë luḡ ya gabum ḡelöng böpata in napip. Sënëḡ mu Anutu ahë sengën.

²⁰ Lob devaḡë wain sënë loḡ gabum böpata medepip ggëp nyëḡ böp Yerusalem nenga. Lob mehönon nij ḡök vu gabum meto meya bevaar

meneya ading rot yoh vu 320 kilomita, log vuuk merak verup vavunë bading yoh vu bë gengon hil mehõnon.

15

Angër Nemadvahi-bevidek-luu Deķo Ngaa Maggin Rot Nemadvahi-bevidek-luu

¹ Log sa halë ngaa böp ngwë tato yi vu yagek, lob sa kenug ya in. Sa halë angër nemadvahi-bevidek-luu denedo bedeko ngaa maggin rot sën rak neggëp hus lo in bë debasap mehõnon beron nemadvahi-bevidek-luu. Nabë ngaa maggin sënë govek na, og la su rëk nom berup vu tamusën gökin rë. Gaķ Anutu ahë sengën maya verök yi rak ngaa maggin rot nemadvahi-bevidek-luu sënë.

² Log sa halë ngaa ti nebë loo, gevong bë de-sarõmin garas los nengwah. Log alam sën devong begö medekesuu bededahun reggu bemën nipaya agi los kenu, garë yi kanak lo, denare lok loo sën nebë garas agi nenga, lob Anutu vo ngaa ni nebë gita ggelek sir bevare deneko.

³ Denevong Anutu yi hur Moses yi raro gedenevong Sipsip Nalu yi raro sën nebë:

“Oo Mehõböp niwëek pin ala hong.

Huk pin sën genevong lo böpata rot behe halë, lob he kwamin ya ngahi in.

Oo mehõnon pin hir Mehõ-los-bengö hong!

Hong ngaa pin og niröp,
beyõnon verök yi!

Mehõböp hong ngo perurek timu vabuung.

⁴ Om alam pin rëk degöneng in hong
gedegekõ arëm jak na vavunë!

Mehõnon pin rëk denam

medenadudek vu hong.
In genesepa loḵ aggata nirōpsèn mu
betōḵ yam rangah ggovek ya.”

⁵ Sènē ggovek, gesa malaḡ yah loḵ bē ayo vabu-
ung soḡek sèn nedo yagek loḵ dub vabuung sël
ayo lo tahinin. Yiḵ Anutu yi dub vabuung sël sèn
netato bē Anutu nedo ving yi alam lo sènē.

⁶ Lob angër nemadvahi-bevidek-luu sèn deḵo
ngaa maggin rot nemadvahi-bevidek-luu lo, vu
dub-vabuung-böp sènē ayo medeluk yam dob.
Deröp tob veroo malangeri beyö niveseek, log
devaḵu ḵabi goor loḵ newaj.

⁷ Log ngaa lubeluu sèn denedo malaj-tumsèn
lo ti vo gabum goor nemadvahi-bevidek-luu vu
angër nemadvahi-bevidek-luu sènē. Lob Anutu
sèn nedo mala-tumsèn degwata los degwata lo ahē
sengèn pup gabum goor nemadvahi-bevidek-luu
sènē.

⁸ Log Anutu niwëek los yi vunek vunek yagek-
yi pup dub-vabuung-böp ayo, lob vong baru verup
ggërin rot, lob mehōti su yoh vu bē doḵ na rē. Gaḵ
rëḵ degegin angër nemadvahi-bevidek-luu sèn lo
gedegevong huk jaḵ ngaa maggin nemadvahi-
bevidek-luu sèn lo begovek na rē, loḵ mēm.

16

Anutu Ahē Sengèn Nedo Loḵ Gabum Goor Nemadvahi-bevidek-luu

¹ Log sa hangō mehōti aye raḵ loḵ dub-vabuung-
böp soḡek, betahi niwëek ya vu angër nemadvahi-
bevidek-luu sènē bē, “Ham na kweseh Anutu ahē
sengèn gabum nemadvahi-bevidek-luu sènē duk
na mejaḵ dob!”

² Lob angër muginsën ya keseh yi yi ya dob. Lob pegges nipaya verök yi genivë rot rak alam sën deneko reggu bemën böp yi kanak rak neggëp navij lo, gerak alam sën deneko kenu rak lo.

³ Log angër netu luu ko yi yi, beya keseh luk ya loo. Lob loo pöö alam-diiksën nij bu rak, log ngaa mala vesa pin sën denedo luk loo lo dediik ya.

⁴ Log angër netu löö keseh yi yi luk ya bël ata pin los bël veyë pin. Lob sir pin kök rak nebë mehönon nij kök.

⁵ Lob sa hango angër sën tu ala benegin bël lo nër bē:

“Genedo gwëbeng, gengo genedo yö vu wirek.

Hong mehö yohvu rot in gevong nyëvewen nebë sënë lok yah vu mehönon.

⁶ Alam sënë dekeseh hong alam losho hong alam-denenër-gägek-rangahsën nij kök medediik,

om sën gevo kök vu alam nij paya sagi in bē denanum.

Deko hir nipaya nyëvewen saga ya meyoh vu.”

⁷ Log sa hango Anutu yi jepö yö tahi bē:

“Eë-ë, yönon, Mehöböp Anutu, niwëek pin yö neggëp vu hong,

om nyëvewen sën genevong lo, og niröp beyoh vu.”

⁸ Log angër netu lubeluu keseh yi gabum rak hes, lob vong behes tum böpata megga mehönon.

⁹ Hes tum benikerus böpata rot, lob vev rak mehönon pangsën rot. Rëk ma, gedenër pelë rak Anutu sën niwëek böpata rot bevong ngaa maggin agi arë. Gesu deggërin sir medeko Anutu arë rak rë.

10 Log angër netu nemadvahi keseh yi gabum rak reggu bemën böp yi sêa-los-arë. Lob malakenu loḵ beggërin alam sën reggu bemën negin sir lo. Deko vanë pangsen rot lob deranga daggej.

11 Kwaj nevo vanë los pegges böp sën rak sir lo, rëḵ ma gedenër pelë rak Anutu sën tu yagek ala lo gesu deggërin ayoj bederuu demij vu ngaa sën denevong lo rë.

12 Log angër netu videk ti keseh yi gabum luḵ ya bël böp Eprates, lob tuus ya, gaggata neggëp vu alam-los-bengöj sën denam vu nyëg mala neverup lo.

13 Lob sa halë memö ningöhek löö nij nebë dek, berak deverup karob böp lööho reggu bemën lu mehö-nenër-gagëk-kuungsën avij.

14 Memö löö sënë og memö nij paya kenuj, bedeyoh vu bë degevong ngaa böp aggagga. Lob deneya vu alam-los-bengöj pin vu dob, in bë dengupin sir bedegevong begö doḵ Niwëek Pin Ala Anutu yi buk böpata sënë.

15 “Ham gwengo rë! Sëḵ nök vu ham nabë sën mehö hodeḵ neyam lo. Nebë sënë, om nabë mehöti su gëp yiing rë, geyi tob jaḵ gëp yi bemedo, og su rëḵ ahë natök balam degelë beninamum rë. Gaḵ mehö saga rëḵ kwa vesa!”

16 Lob memö lo desupin alam-los-bengöj losho hir alam lo ggëp nyëg sën Hibru denenër loḵ ayej bë Armagedon lo.

17 Log angër netu videk luu keseh yi gabum ya merak nyëg meris loḵ yagek los dob vuheng atov. Lob mehöti aye rak böpata vu Anutu yi sêa-los-arë loḵ dub ayo vabuung soḡek metahi yam bë, “Ggovek ya saga!”

18 Log davĕs vĕr behang meya, gededun rak, lob vakuvek tetap, gejemapi ggee bōpata rot. Vu buk pin sĕn mehōnon denedo vu dob agi, og jemapi ti su neggee bōpata rot nebĕ ti sĕnĕ wirek rĕ.

19 Nyĕg bōp Yerusalem vasuh yi ya yu lōō, lob mehōnon pin hir nyĕg bōp bōp pin detamang beto denedo. Log Anutu kwa vo nyĕg bōp Babulon* ving, lob vong ba, Babulon* num loḵ kap sĕn wain nedo loḵ lo. Wain sĕnĕ og yiḵ Anutu ahĕ sengĕn.

20 Log ḵedu loo vuheng pin malaj maya, log ḵedu pin derurin to, besu denare ggōkin rĕ.

21 Log hob lulanon lev rak. Lob hob lulanon sĕnĕ, og ḵemu bōp bōp beti ti hir maggin yoh vu padi bĕĕk ti. Luḵ yam vu yaḡek beto nesis mehōnon, lob deḵo maggin nipaya verōḵ yi rak hob lulanon sĕnĕ, rĕḵ ma gedenenĕr ḡaḡek nipaya rak Anutu in hob lulanon sĕn to mesis sir agi.

17

Avĕh Baggĕb Bōp Ḷol Nipaya Nyĕvewen

1 Angĕr nemadvahi-bevidek-luu sĕn deḵo gabum nemadvahi-bevidek-luu lo ti yam vu sa benĕr bĕ, “Dus rak bĕ avĕh baggĕb los bengō sĕn tu ala menegin yi alam ggĕp bĕl ngahi nengaj lo ḡeḵo yi nipaya nyĕvewen. Om ḡenam besa tato vu hong.

2 Alam-los-bengōj pin vu dob devong baggĕb ngahiseḵĕ vu avĕh sĕnĕ. Gemehōnon pin vu dob devong baggĕb vu yi ving, lob yuj vong paya nebĕ sĕn mehōnon denenum meyuj nevong paya lo.”

3 Log angĕr sĕnĕ ḵo sa ḵenug meya nyĕg-yumeris ti. Lob sa halĕ avĕh ti rak nedo reggu bemĕn ḵōḵ

ti demi vu sagu. Lob gagek ngahisekë neggëp rak reggu bemën sënë navi beggërin pin. Gagek sënë og yik arë sën gagek pelësën nipaya aggagga. Log reggu bemën böp ti sënë yu nemadvahi-bevidek-luu, gevis nemadluho.

⁴ Avëh sënë röp tob kōk los mala sagap beyi vunek vunek aggagga rak goor ga, vunek vunek sën denesemu rak gelöng malangeri los kumkum sën yi monë böpata lo. Log jom kap goor lok nema. Lob ngaa nivë aggagga sën Anutu nelë bë su yoh vu rë lo, los avëh baggëb sënë yi ngaa ningöhek aggagga, bepin pup kap sënë.

⁵ Log dekevu arë rak neggëp daba. Arë sënë og yik gagek peggirinsën mu nebë:

NYËG BÖP BABULON* AVËH BAGGËB PIN LOS
NGAA NIPAYA VERÖ K YI PIN VU DOB LO ATAJ.

⁶ Avëh sënë sis Anutu-yi-alam loشو alam sën denevong ving Yesu medenenër arë rangah lo medediik. Avëh sënë num nijkōk lob sa halë bë yu vong paya nebë sën alam denenum bël mengëës lo. Sa halë sënë, lob sa helëk bekwag ya ngahi.

⁷ Lok angër lok tepëk vu sa bë, “Kwam neya ngahi in va? Sengo rëk tatekin avëh sënë luho reggu bemën hir gagek vunsën degwa rangah vu hong. Yik reggu bemën sën yu nemadvahi-bevidek-luu, gevis nemadluho, beko avëh meneya agi.

⁸ Gelë reggu bemën böp sënë ggovek ya. Yö nedo vu wirek, rëk gwëbeng og su nedo rë. Rëk mu vu tamusën, og rëk yi vu asoreng sën luk meya rot gahë degwa ma lo bejak nom vavunë, lok mëm mala nama na verök yi. Alam dob yi sën Anutu su kevu arëj lok ya kapiya-mala-tumsën-yi lok buk

sĕn tung dob los yagek lo rĕ, og rĕk degelĕ reggu bemĕn nipaya sĕnĕ, lob ķenuj na in yi. In nedo wirek, log gwĕbeng og su nedo rĕ, loķ rĕk nom berup gōkin vu tamusĕn.

⁹ Mehōti sĕn kwa nivesa lo, og yoh vu bĕ rĕk jaķ ngaa sĕnĕ ni megero. Yuseķĕ nemadvahi-bevidek-luu sĕnĕ og yik nepeggirin raķ ķedu nemadvahi-bevidek-luu, lob avĕh sĕnĕ nedo raķ ķedu nemadvahi-bevidek-luu sĕnĕ.

¹⁰ Log yuseķĕ nemadvahi-bevidek-luu sĕnĕ og yik nepeggirin raķ alam-los-bengōj nemadvahi-bevidek-luu. Nemadvahi malaj ma vorot, log ti nahĕn nedo gwĕbeng, log ti nahĕn gesu tu mehō-los-bengō rĕ. Om rĕk natu mehō-los-bengō vu tamusĕn. Govek, loķ yik medo hus dus teka mu.

¹¹ Log reggu bemĕn sĕn nedo vesa wirek rĕk su nedo gwĕbeng rĕ agi, loķ ya ving betu nemadvahi bevidek lōō raķ. Rĕk mu yik alam-los-bengōj nemadvahi-bevidek-luu sĕnĕ ti yi, rĕk mu rĕk mala nama na verōķ yi.

¹² Log vis nemadluho sĕn gelĕ lo, og yik nepeggirin raķ alam-los-bengōj nemadluho. Rĕk mu yō denahĕn gesu detu alam-los-bengōj raķ rĕ. Rĕk mu rĕk degeķo nij wĕĕķ bōpata rot geving reggu bemĕn bōpata sĕnĕ, medenatu alam-los-bengōj noh vu yik hes mala timu.

¹³ Alam-los-bengōj sĕnĕ yik kwaj nevo ngaa neggĕp ti. Niwĕĕķ los niwĕĕķ bōpata rot sĕn neggĕp vu sir lo, og rĕk degadu reggu bemĕn nipaya jaķ mededoķ vu.

¹⁴ Lob rĕk losho Sipsip Nalu dengis sir, lob Sipsip Nalu ngis sir mekesuu sir na verōķ yi. In yi tu alam bōp bōp pin hir Mehōbōp, galam-los-bengōj pin hir

Mehö-los-bengö. Lob yi alam sën denesepa loḵ yi lo, og rëḵ degevonḡ begö sënë medekesuu. Sir sën tato sir vorot beggoin sir raḵ bedetu yö yi ngaa bedenevonḡ ving aye lo.”

¹⁵ Log angër nër vu sa bë, “Bël ngahi sën gelë avëh baggëb nedo nengaj lo, og sagak yik alam pin, gesir yu böp böp sën desupin sir medenedo lo, galam pin sën navij aggagga lo, gayej agga ti ti pin.

¹⁶ Log vis nemadluho sën gelë ggovek ya bë peggirin raḵ alam-los-bengöj nemadluho lo, og sir pin losho reggu bemën böp rëḵ degërin sir medegelë avëh baggëb sën lo paya. Rëḵ debasap yi bedenakah hen tob pin vër gegëp ahë töksën. Log rëḵ dega reggos gedebesi sekë lu ngaa jaḵ na nengwah.

¹⁷ Yönon, Anutu vo kwa sënë loḵ ya ayoj in bë degevonḡ ngaa sën kwa nevo lo. Lob kwaj bo ngaa gëp ti. Log niwëëḵ böp sën deḵo in denatu alam-los-bengöj lo, og rëḵ degadu reggu bemën nipaya jaḵ mededok vu rot, bena berup dok buk sën Anutu yi gägeḵ pin anon jaḵ lo.

¹⁸ Log avëh sën gelë lo, og yik peggirin raḵ nyëḡ böp Babulon* sën tu alam-los-bengöj pin vu dob hir yuseḵë lo.”

18

Nyëḡ Böp Babulon Mala Maya*

¹ Sënë ggovek, log sa halë angër ti vu yaḡek beluḵ yam. Yi niwëëḵ böpata rot, genikapiik jëh raḵ dob bemedo nepelibin mu.

² Lob taḥi yam niwëëḵ bë:
 “Nyëḡ böp Babulon* bumeng ya! Bumeng ya!

- Gwëbeng tu memö nij paya hir nyëg rak.
 Memö nij ngöhek pin,
 gesok nij paya pin sën hil nahönengin lo bej.
- ³ In alam pin denevong ngaa baggëb yi ngahisekë
 vu yi.
 Lob sënë vong bë sën denum yi wain niwëëk
 beyuj vong paya.
 Galam-los-bengöj lo vu dob sënë devong baggëb vu
 yi ving.
 Galam-dob-yi sën denevong huk bagosën lo
 denevong huk bagosën rak ngaa sën ayo
 nevu nevu in lo,
 bedenekö monë ngahisekë rak.”
- ⁴ Log sa hango gagek ngwë yam vu yagek menër
 bë:
 “Sa alam, ham gwetah ham in nyëg böp saga.
 Gemedo na nenga.
 In ham los sir rëk gwebë dok ti in yi ngaa
 nipaya saga.
 Geham los sir rëk gwebë dok ti begweko yi
 ngaa nipaya nyëvewen.
- ⁵ Yi ngaa nipaya vong bë sën yu böpata megelu lok
 ya yagek.
 Lob Anutu medo mekwa nevo nyëg böp sënë
 yi ngaa nipaya pin.
- ⁶ Ham kwamin bo ngaa agga ti ti sën avëh baggëb
 agi nevong lo,
 beham bo dok nah vu yi nabë sënë niröp rot.
 Ham bo nyëvewen dok nah ngaa sën nevong lo
 niröp,
 gegwevong la mesevök geving.
 Avëh sënë tee marasin nimengëës lok kap in bë
 mehö ngwë denanum,

om yik ham jaa ngaa ngaa nimengēēs nabē
 saga dok nah,
 geyu ngwē sevōk geving begwetee dok kap in
 nanum.

⁷ Yō nekerē arē rak benevong ngaa nipaya
 sēn ayo nevu nevu in lo agga ngahisekē.

Om ham gwevong meyō pasang ngu rot dok nah.
 In kwa nevo lok ayo nebē sēnē bē,

‘Setu avēh-los-bengōg benado rak avēh-los-bengō yi
 sēa.

Sa su nebē avēh sēn regga diik genedo alov lo
 rē.

Om maggin su rēk natōk jak sa mesengu rē,
 gak rēk nama verōk yi.’

⁸ Om ngaa maggin rot aggagga rēk natōk vu yi
 avuti dok buk timu.

Niraksēn ngahisekē rēk berup,

lob yi alam ngahisekē rēk pasang dengu in hir
 heljēng rot,

gemeyip bōpata rēk berup.

Log nengwah rēk ga nyēg bōp Babulon* los dahis.

Yōnon, Mehōbōp Anutu yi mehō niwēek los
 gayeheng,

om seggi yi benēr vorot bē geḳo nipaya
 nyēvewen dok nah.

⁹ Alam-los-bengōj vu dob losho avēh sēnē
 denevong baggēb los denevong ngaa agga
 ngahisekē sēn ayoj nevu nevu in lo. Om alam-
 los-bengōj sēnē rēk degelē genengwah natum
 bega yi baru jak, lob rēk dengu medengis sir.

¹⁰ Rēk degōneng rot in vanē sēn tōk vu yi agi, lob
 rēk debare ading gedenanēr nabē:

‘Wōp-o, gēpin nyēg bōp Babulon*!

Nyèg böp los niwëek ata hong!
Nyëvewen nipaya tök vu hong ggovek ya yik pevis
avuti!

11 Lob alam vu dob sën denevong huk bagosën
lo rëk kwaj bo nyèg böp sënë, lob rëk dengu in,
bedemedo los ayoj maggin. In mehõnon la su
denebago hir kupek yah ggökin rë.

12 Hir kupek lo yik nebë sënë: Goor los seriva,
gegelöng malangeri los kumkum sën yi monë
böpata lo, getob veroo malangeri, getob mala
sagap aggagga, getob niyes yes sën nikapiik
lo, gejerujeng navi, gekele sën reggu nivesa lo,
gengaa pin sën denesemu rak reggu böp elefant
vis lo, gengaa pin sën denesemu rak kele sën yi
monë böpata lo, gedenesemu rak braas, gerak aën
gerak gelöng ni ketungsën lo.

13 Log kupek la nebë sënë: Kele sinamon navi los
yesek lu ngaa sën nos yi lo, gekabang aru reggu
nivesa ga, mur los praginsëj*, gewain los wël*
-oliv-yi sën denevesi nos rak lo ga, parawa brët yi
los wit*, geburmakau los sipsip, gehoos los karis
sën hoos denedadii lo, gemehõnon sën denebago
sir in denatu hir ngaa meris lo, log mehõnon sën
denebago sir in debasap sir noh vu yö kwaj lo.

14 Log denër bë, 'Yõnon, nos sën kwam nedu in
bë gegwa lo, og pin devuu hong gedeya. Gekupek
nivesa vesa pin lu ngaa sën yi monë böp lo, los
hong vuneksën nivesa vesa pin sën lo, og devuu
hong ya. Mehõnon su rëk degelë ngaa nabë sënë
gökin gemedo vu hong rë!

15 Yõnon, alam sën denevong huk bagosën rak
ngaa agi, bedeneko monë ngahi vu nyèg böp agi
rëk degöneng rot in vanë sën natök vu nyèg böp agi,

lob rĕk debare ading in yi gedengu medengis sir, gemedo los ayoj maggin.

¹⁶ Log denanĕr nabĕ:

‘Wöp-o, gĕpin nyĕg böp sĕnĕ!

Wirek og yö neröp tob veroo malangeri ngeri,
getob sagap los kĕk,
genevunek vu navi rak goor,
gerak gelong malangeri los kumkum sĕn yi
monĕ böp rot lo.

¹⁷ Rĕk ma gemonĕ sĕnĕ los kupek gevunek vunek bemalaj maya yik pevis avuti.’

Log kaptan los alam sĕn deneko yag lo pin, galam pin sĕn denvong huk rak yag lo, galam pin sĕn denvong huk bagosĕn rak yag medeneggok loo lo, yö rĕk debare gĕp ading in nyĕg böp Babulon*.

¹⁸ Log degelĕ nengwah sĕn negga yi lo aru jak, lob degengeek nabĕ, ‘Nyĕg böp ti tena los arĕ böp mak nebĕ nyĕg böp sĕnĕ menedo? Ma! Yik yö timu!’

¹⁹ Log yö rĕk dejaa kebus dok yuj, gedengu bedengis sir bedemedo los ayoj maggin. Log rĕk detahi nabĕ:

‘Wöp-o, gĕpin nyĕg böp sĕnĕ!

Yag alaj lo sĕn denedo rak loo lo detu alam-los-bengoj-monĕ-ggoreksĕn rak nyĕg böp sĕnĕ yi monĕ.

Gĕpin-o! Yik mala maya verok yi pevis avuti!

²⁰ Om ham vu yagek los Anutu-yi-alam, geham sinarĕ los alam-denenĕr-gagek-rangahsĕn lo!

Ham pin kwamin vesa in ngaa sĕn tok vu nyĕg böp agi.

Anutu seggi yi, lob vo nipaya nyëvewen vu yi
 loḵ yah ngaa nipaya sën nevonḡ vu ham lo.' ”

21 Gageḵ sënë ggoveḵ, loḡ angër niwëëḵ ata ti ḵo
 ḡelöng ti ni nebë ḡelöng böp sën denerii wit* raḵ lo,
 lob vaḵu raḵ betë luḵ ya loo, loḡ nër bë:

“Rëḵ degeḵo nyëḡ böp Babulon* medegetë na ni-
 wëëḵ nabë saḡi,
 gemehönon su rëḵ degelë yi nah göḵin rë.

22 Nebë sënë om gita aye, gegeveëḡ aggagga ayej,
 gegeveëḡ apel los avuuk ayej,
 oḡ su rëḵ degengo ngaa pin sënë ayej doḵ hong
 nah göḵin rë.

Gemehöti sën tahu yi loḵ huk agga pin lo,
 oḡ su rëḵ degelë alam nabë sënë demedo vu
 hong nah göḵin rë.

Gegelöng böpata sën nerii wit* genesu maye neya
 lo,
 oḡ su rëḵ degengo aye sënë gengu doḵ hong
 nah göḵin rë.

23 Ram su rëḵ natum doḵ hong
 bahëḡḡi nah göḵin rë.

Log su rëḵ degengo avëh los maluh sën denëḵo sir
 lo
 gedebengwëng los kwaj vesa göḵin rë.

Wireḵ hong alam lo sënë devonḡ huk bagosën, lob
 detu böp vu dob.

Log ḡekuung in alam pin raḵ hong ngaa ag-
 gagga sën ḡenetung bu raḵ lo.

24 Log detöḵ raḵ alam-denenër-ḡageḵ-rangahsën
 loḡho Anutu-yi-alam ḡesir pin
 sën denesis sir medenediik vu dob lo pin nij
 ḵöḵ loḵ hong Babulon,
 bedegwa negḡëp vu hong.”

19

Alam Kwaj Vesa In Babulon Mala Maya*

¹ Sènè ggovek, log sa hango ngaa ti nebè sèn alam ngahisekè denevong raro vu yagek, bedenènèr bē:
 “Aleluya!

Hil Anutu, yi yō timu sèn ko hil yom vu yi.

Yi mehō niwëek los vunek vunek yagek-yi malangeri rot.

² Nengo gagek, og nesepa loḵ ngaa niröp mu menseggi alam raḵ,

benevong nyëvewen loḵ yah vu sir niröp rot.

Lob avëh-baggëb-los-bengö sènè nevasap alam-dob-yi pin raḵ yi baggëb,

om sèn Anutu vo nipaya nyëvewen loḵ yah vu yi,

bevo nyëvewen loḵ yah yi alam sèn nesis lo nij kök.”

³ Lok detahi yah ggökin bē:

“Aleluya! Hil gako Anutu arë jaḵ!

Nengwah sèn gga nyëg böp agi aru medo neraḵ degwata los degwata!”

⁴ Log alam ggev mehödahis-bevidek-lubeluu sèn lo, losho ngaa lubeluu sèn denedo malaj-tumsèn lo, depetev medeneggëp loḵ Anutu sèn nedo raḵ sëa-los-arë lo mala, gedeko arë raḵ bē:

“Yönon rot! Aleluya!”

⁵ Lob mehöti aye raḵ ggëp Anutu yi sëa-los-arë, benër bē:

“Ham sèn Anutu yi hur ham,

beham nehönengin yi lo,

geham alam yumin ading los ham alam meris,

ham pin gweko Anutu arë jak!”

Sipsip Nalu Kō Avēh Medenevong Nos Bōpata

⁶ Log sa hangō ngaa ti nebē sēn alam ngahisekē rot desupin sir bedenenēr gagek, lob dedun nebē sēn lubek bōpata. Genebē sēn vaḱuvek netetap bededun bōpata lo, bedenenēr bōpata bē:

“Aleluya! Hil gaḱo Anutu arë jak!

Hil Mehōbōp Anutu, yi mehō los niwēek!

Gwēbeng tu ala soḱek menegin ngaa pin!

⁷ Hil ahēd nivesa menapisek in yi rot gegako arë jak!

In buk dus raḱ ggovek ya in Sipsip Nalu vongin geḱo avēh.

In venē ro yi ggovek ya menegin.

⁸ Lob Anutu vo rōprōp veroo malangeri vu yi berōp loḱ yi.

Rōprōp sēnē yō mewis anon benepelibin.”

(Rōprōp veroo sēnē yik tahu ngaa nirōp sēn Anutu yi alam denevong lo.)

⁹ Log angēr nēr vu sa bē, “Gekwevu gagek sēnē nabē: Alam sēn Anutu vong dik ya in sir bē denam in nos bōp sēn Sipsip Nalu geḱo avēh lo, og kwaj vesa!” Log nēr vu sa ving bē, “Gagek sēnē og Anutu yi gagek anon.”

¹⁰ Lob sa petev loḱ angēr vaha gesa bē gaḱo arë jak, loḱ nēr vu sa bē, “Su gwevong nabē sēnē! Yik sa hur mu nebē ham los arim lo pin sēn ham ayomin neya timu vu Yesu menenēr yi gagek rangah lo. Yik ham gweko Anutu yō timu arë jak. Hil arak ni bē Anon Vabuung vong huk loḱ alam-denenēr-gagek-rangahsēn ayoj bē denanēr Anutu yi gagek

rangah, genevong huk loḵ alam sĕn denenĕr Yesu arĕ rangah lo ving nebĕ saga.”

Mehö Sĕn Raḵ Hoos Veroo

¹¹ Log sa halĕ yaḡek tateḵin gehoos veroo ti nare. Bemehöti raḵ nedo, barĕ nebĕ “Mehö Sĕn Nevong Yoh Vu Yi Gaḡek” ga, “Mehö Gaḡek Anon Yi”. Nabĕ mehöti sĕnĕ gengö gaḡek, genabĕ gevong begö, og nesepa loḵ aggata niröp mu menevong.

¹² Mala gahis netum nebĕ nengwah daggen, gemehö-los-bengö yi madub ngahiseḵĕ raḵ nedo yu. Gedekevu arĕ raḵ neggĕp navi, rĕḵ yö timu raḵ arĕ sĕnĕ ni, gaḵ alam vahik su derak ni rĕ.

¹³ Generöp röpröp ading sĕn dedagoo loḵ kḵ lo. Log denenĕr arĕ bĕ, “Anutu yi Gaḡek”.

¹⁴ Log alam-begö-yi vu yaḡek derak hoos veroo, bedetamuin yi medeya. Gederöp tob veroo malangeri benikapiik menepelibin.

¹⁵ Paĕp-yu-anil nevu malangeri rot ti vare nesoo loḵ alaj avi, beneggĕp in bĕ ngis mehönon jak. Log nejom aĕn dus ti loḵ nema in gegin mehönon jak. Anutu mehö niwĕĕk ata, bahĕ sengĕn böpata vu alam sĕn su ayoj neya timu vu yi rĕ lo, om rĕḵ bakĕ sir na nabĕ sĕn denevaḵĕ wain anon loḵ gabum böp ayo lo.

¹⁶ Gedekevu mehö sĕnĕ arĕ raḵ neggĕp yi tob los vaḡi nebĕ:

“ALAM-LOS-BENGÖJ PIN HIR MEHÖ-LOS-BENGÖ,
GALAM BÖP PIN HIR MEHÖBÖP.”

¹⁷ Log sa halĕ angĕr ti nare loḵ hes mala. Gene-tahi ya vu soḵ pin sĕn denevĕĕng medeneyoh

vavunē lo bē, “Ham pin ngupin ham nam in Anutu yi nos böp.

¹⁸ Ham rēk gwa alam-los-bengōj nij reggos geham rēk gwa alam yuj rēmek los alam anil degwa nij reggos gehos los alam sēn denerak lo nij reggos. Ham rēk gwa alam pin nij reggos, alam sēn yō denegin sir lo, losho alam sēn alam denebago sir medenetu hir ngaa meris lo, galam sēn yuj ading los alam meris lo.”

¹⁹ Lob sa halē reggu bemēn böp galam-los-bengōj pin vu dob losho hir alam-begō-yi desupin sir yam ggovek ya in bē dengis begō vu mehō sēn rak nedo hoos veroo lo losho yi alam-begō-yi.

²⁰ Rēk ma gedekesuu sir bedejom reggu bemēn böp ving yi mehō sēn nenēr-gāgek-kuungsēn-rangah lo ahon mededuu luho. In wirek og reggu bemēn nipaya sēnē lē gemehō-nenēr-gāgek-kuungsēn sēnē nevong ngaa böp ngahisekē benetetuhin alam sēn deneko reggu bemēn yi kanak rak navij gedeneko kenu rak lo. Om reggu bemēn luho mehō-nenēr-gāgek-kuungsēn sēnē yō nahēn denedo los malaj vesa. Log detē luho luk ya nengwah sēn bōpata rot nebē ngaggee, genikerus ata gegelōng salpa* medo netum lok lo.

²¹ Log mehō sēn neraḱ hoos lo sis luho hir alam vahi sēn nahēn denedo vesaj lo pin rak paēp-yu-anil sēn vare nesoo lok avi lo medediik. Log sok pin yam degga alam sēnē nij reggos bahēj pup ya.

20

Satan Nedo Karabus Ta 1,000

¹ Lob sa halë angër ti vu yagek meluḵ yam. Lob jom kii asoreng sën luḵ meya rot gahë degwa main lo loḵ nema, bejom sëng böpata rot loḵ nema ving.

² Jom ḵarob böp sënë ahon. Yiḵ marub sën yö neggëp vu nyëdahis lo. Yi Memö Nipaya, geyi Satan. Lob angër duu yi raḵ sëng niwëëk in bë medo noh vu ta 1,000.

³ Log të yi luḵ ya asoreng sën luḵ meya rot gahë degwa main lo, gepeḵa avi yah, besis loḵ in, gejegwi ḵele niḵegwi* rak. Om Satan su yoh vu bë tetuhin alam gökin rë, gaḵ yö rëḵ gegin ta 1,000 sënë begovek na rë, loḵ mëm degeḵo yi vër beyiḵ medo hus dus teka mu.

⁴ Log sa halë sëa-los-arë la denedo bemehö la raḵ denedo. Anutu vo huk vu sir in bë deseggi mehönnon hir gägek. Gesa halë alam ngahiseḵë sën denevong ving Yesu lo anoj. Sir sën denenër Yesu yi gägek tato, gedenenër Anutu yi gägek rangah, lob alam nij paya deketöv kwaj bedenediḵ lo. Su denedudeḵ vu reggu bemën nipaya, ma denedudeḵ vu ḵenu rë. Gesu denebë yi ḵanak raḵ dabaj ma raḵ nemaj rë. Lob vesaj loḵ yah bedetu alam-los-bengöj, belosho Kerisi denegin ngaa pin yoh vu ta 1,000.

⁵ Yiḵ buk muginsën sën alam dekedidi jaḵ vu bedub lo sënë. Rëḵ alam diiḵsën vahi pin su rëḵ dekedidi jaḵ nah doḵ buk sënë rë, gaḵ yö rëḵ degëp rot, beta 1,000 saga govek na rë.

⁶ Alam sën dekedidi jaḵ nah doḵ buk muginsën agi, og kwaj vesa bedemedo vabuung. In diiḵsën sën natu luu lo niwëëk su yoh vu bë dahun sir rë. Gaḵ rëḵ denatu Anutu luho Kerisi hir alam-deneḵo-seriveng lo. Lob rëḵ denatu alam-los-

bengöj belosho Kerisi degegin ngaa pin noh vu ta 1,000 sënë.

Satan Kepë Ya

⁷ Ta 1,000 sënë govek na, loḵ mēm degeḵo Satan bër in ḵarabus,

⁸ gegeto mena in tetuhin alam pin, benoh vu alam sën denedo dob nenga ḵetu lubeluu lo, vu Gok losho yi alam Magok. Satan rëḵ ngupin sir in na degevong begö, lob sir ngahiseḵë rot nebë sën raggër loo nenga.

⁹ Bededok na nyëḡ pin medeketumin Anutu-yi-alam dok nyëḡ sën denedo loḵ lo. Yik nyëḡ böp sën Anutu ahë neving pangsën lo. Rëḵ mu nengwah rëḵ duk nam vu yageḵ mega sir.

¹⁰ Satan tetuhin sir, om Anutu rëḵ getë yi duk na ngaggee böpata sën nengwah nikerus ggëp netum raḵ gelöng salpa* lo. Reggu bemën nipaya luho mehö-nenër-gageḵ-kuungsën-rangah denedo loḵ sënë vorot, om lööho rëḵ degeḵo vanë buk gerangah degwata los degwata gesu rëḵ desewah rë.

Buk-gageḵ-yi Tök Yam

¹¹ Log sa halë sëa-los-arë veroo böp ti nedo, bemhöti nedo raḵ. Gedob los yageḵ veya meya in yi, genyëḡ meris.

¹² Gesa halë alam-diiksën denare, alam yuj ading los alam meris, medenare loḵ sëa-los-arë sagi mala. Gemehö sën raḵ nedo sëa lo vong medetëḵin ḵapiya la. Detëḵin ḵapiya malatumsën-yi, gedetëḵin ḵapiya sën neseggi alam-diiksën raḵ lo la ving. Nelë ngaa pin sën mehönon

denevong lob denekevu loḵ ya ḵapiya agi bene-seggi sir raḵ yoh vu.

¹³ Log alam sèn denediik medeneggëp luḵ loo lo, galam sèn denediik medeneggëp loḵ dob gebinë lo, losho alam-diiḵsèn pin deyom, bemehö sèn nengo gagek lo seggi sir ti ti loḵ yah ngaa sèn denevong wirek lo.

¹⁴ Lob të alam malaj-masën-yi los alam sèn denedo loḵ Nyëg Nipaya lo luḵ ya ngaggee böpata sèn nengwah medo netum loḵ lo. Ngaggee böpata sèn nengwah medo netum loḵ agi, og yik diiḵsèn sèn netu luu lo.

¹⁵ Lob alam sèn su arëj neggëp loḵ ḵapiya mala-tumsèn-yi agi rë lo, og të sir pin luḵ ya ngaggee böpata sèn nengwah medo netum loḵ lo ving.

21

Yagek Los Dob Mewis

¹ Log sa halë yagek los dob mewis neggëp. Yagek muginsèn los dob muginsèn mala maya veröḵ yi. Geloo su neggëp ggökin rë.

² Gesa halë nyëg böp vabuung sënë, og yik Yerusalem mewis. Sa halë nedo ving Anutu, lob vuu yagek beluḵ yam los vunek vunek nivesa nebë sèn avëh nevunek vu yi raḵ vunek vunek nivesa in jaḵ regga.

³ Log sa hango aye böpata ti tahi yam ggëp sëa-los-arë bë, “Ham gwengo rë! Gwëbeng Anutu yi dub-vabuung-böp nedo ving mehönon! Log Anutu rëḵ medo geving sir bedenatu yi alam. Yönon, Anutu yö rëḵ medo geving sir benatu hir Anutu.

⁴ Rëḵ jevu sir pin malaj bël na. Galam su rëḵ denadiik gökin rë, gesu rëḵ ayoj maggin gökin rë,

gesu rĕk dengu medengis sir gökin rĕ, genavij su rĕk gesang nah rĕ. Gaḵ ngaa wirek hen pin maya veröḵ yi.”

⁵ Lob mehö sĕn raḵ nedo sĕa-los-arĕ lo nĕr bĕ, “Ham gwengo rĕ! Sĕḵ gevonḡ ngaa pin natu mewis jaḵ yik pehiko sĕnĕ!” Log nĕr vu sa bĕ, “Kwevu gagek sĕnĕ, in gagek sĕnĕ og yönon rot, beyoh vu bĕ alam degevonḡ geving rot.”

⁶ Log nĕr vu sa ggökin bĕ, “Ngaa pin sĕnĕ töḵ yam ggovek ya! Sengo ti hevong bengaa pin anon raḵ vu muginsĕn, log saḵ semu ngaa pin vu tamusĕn sagi beggovek ya. Setu ngaa pin degwaseḵ los yuseḵ. Nabĕ mehöti ayo bev in bĕl, og sĕḵ gevonḡ bĕl veyĕ mala-tumsĕn-yi benanum nyĕmasĕn.

⁷ Mehöti sĕn kesuu ngaa maggin los ngaa nipaya pin lo, og rĕḵ geḵo ngaa sĕn senĕr wirek bĕ rĕḵ geḵo lo natu yi ngaa, gesa natu yi Anutu genatu sa nalug.

⁸ Gaḵ alam sĕn deneggöneng medeneggĕrin sir yah lo, galam sĕn deneruu demij vu Anutu lo, galam sĕn denesepa loḵ ngaa nipaya veröḵ yi medeneko raḵ lo, galam sĕn denesis mehönon medenediik lo, galam sĕn denevonḡ baggĕb lo, galam sĕn denevonḡ parahek lo, galam sĕn dene-dudeḵ vu ḵeriing lo, galam pin sĕn denenĕr gagek kuungsĕn los denelah gagek vun lo, og sir pin rĕḵ dedoḵ na ngaggee böpata sĕn nengwah nivanĕ medo netum raḵ gelönḡ salpa* lo. Yik diiksĕn netu luu lo sĕnĕ.

Yerusalem Mewis

⁹ Lob angĕr nemadvahi-bevidek-luu sĕn deḵo ngaa maggin nemadvahi-bevidek-luu loḵ gabum nemadvahi-bevidek-luu in bĕ dekevoh mehönon

jak lo ti yam vengwëng vu sa benër bē, “Genam rëk sëk tato avëh sën Sipsip Nalu rëk geķo natu venë lo vu hong.”

¹⁰ Log angër ķo sa ķenug meya ķedu böp adingsekë ti, betato nyëg böp vabuung Yerusalem sënë vu sa. Nedo ving Anutu, lob vuu yagek geluķ yam.

¹¹ Anutu nikapiik jëh niwëek raķ nyëg böp sënë. Nikapiik yö agga ti nebë gelöng sën denebaķo raķ monë böp lo. Kë! Nebë gelöng malangeri jaspā, gemala rangah rot nebë garas.

¹² Log ķatum og vaha adingsekë rot, geyi veluung avi nemadluho-bevidek-luu neggëp loķ, bangër nemadluho-bevidek-luu denare yoh vu pin. Log alam Israel degwaj nemadluho-bevidek-luu arëj ti ti neggëp raķ veluung avi ti ti pin.

¹³ Veluung avi löö neggëp loķ ķatum nenga sën neya los hes mala neverup lo, gelöö neggëp ya los sën ayööng neyam lo. Gelöö neggëp ya los sën sang neverup lo, gelöö neggëp ya los sën hes mala nemasuseķ ya.

¹⁴ Nyëg böp sënë yi ķatum ahë degwa, og gelöng sën bo niwëek vu lo nemadluho-bevidek-luu neggëp loķ, lob Sipsip Nalu yi sinarë nyëdahis nemadluho-bevidek-luu sën lo arëj raķ neggëp gelöng sënë.

¹⁵ Log angër sën vengwëng vu sa lo, jom atoheng goor ti in bē tahöö nyëg böp sënë los yi veluung avi geyi ķatum jak.

¹⁶ Nyëg böp sënë yi ķatum nenga vahi vahi pin neggëp ti, nyë los kweben neggëp ti. Angër tahöö nyëg böp sënë nenga telësen raķ yi atoheng, lob ading yoh vu 2,400 kilomita. Nyëg böp nenga

vahi vahi pin ading nebë sënë, gerak rak yi bepin neggëp ti.

¹⁷ Log tahöö katum ving, rëk adingsekë berak ya vavunë rot yoh vu 66 mita. Yiķ angër tahöö katum nebë sën yiķ hil netahöö lo.

¹⁸ Anutu semu katum sënë rak gelöng malangeri jaspä. Log semu nyëg böp sënë rak goor yö meris bemedo netum nebë garas.

¹⁹ Anutu vunëķ vu nyëg böp yi katum ahë degwa rak gelöng malangeri aggagga sën yi monë böpata lo.

Gelöng jaspä nedo ya ahë degwa mugin.

Log gelöng lapis lasuli sën niraru lo netu luu.

Log gelöng aget sën niraru nebë lo netu löö.

Log gelöng nimewis emeral netu lubeluu.

²⁰ Log gelöng sardoniks sën kōķ los veroo nesala yi lo netu nemadvahi.

Gegelöng kōķ konelian netu videk ti.

Gegelöng krisolit sën nisangsang lo netu videk luu.

Log gelöng nimewis ngwë sën beril lo netu videk löö.

Log gelöng nisangsang ngwë sën topas netu videk lubeluu.

Log gelöng nimewis ngwë sën krisopres netu nemadluho.

Log gelöng niraru ngwë sën hiasint netu nemadluho-bevidek-ti.

Log gelöng sekwahek agga ngwë sën mala sagap medenenër arë nebë ametist lo netu nemadluho-bevidek-luu.

²¹ Log vong reping nemadluho-bevidek-luu sën lo rak kumķum veroo (perl) sën yi monë böp lo nemadluho-bevidek-luu. Deķo kumķum böp böp

medesemu reping pin rak, gedesemu aggata pin vu nyëg saga rak goor yö meris bemala rangah rot nebë garas.

²² Log sa su halë dub-vabuung nedo loḵ nyëg böp sënë rë. Gaḵ Mehöböp Anutu, mehö los niwëëk, luho Sipsip Nalu, yik detu nyëg böp sënë yi dub-vabuung.

²³ Lob alam nyëg saga su rëḵ deḵ vu in hes los kwev nabë natum vu sir rë. Gaḵ Anutu niḵapiik netum rak nyëg saga, geSipsip Nalu tu nyëg sënë yi ram.

²⁴ Om alam pin rëḵ dena jaḵ nyëg böp sënë yi rangah. Galam-los-bengöj vu dob rëḵ dengupin hir kupeḵ nivesa vesa medegeḵo mededoḵ na.

²⁵ Su rëḵ debehii ḵatum yi veluung avi rangah rë, gesu rëḵ nabuk doḵ doḵ nyëg sënë rë.

²⁶ Alam pin rëḵ dengupin hir ngaa nivesa vesa los hir kupeḵ malangeri mededoḵ na nyëg sënë.

²⁷ Gaḵ ngaa ningöhek, gemehönon sën denevong ngaa nipaya aggagga lo, gemehönon sën denenër gageḵ kuungsën lo, og su rëḵ dedoḵ na nyëg sënë rë. Gaḵ alam sën arëj neggëp loḵ Sipsip Nalu yi ḵapiya-mala-tumsën-yi bë demedo malaj-tumsën degwata lo mu mëm sën rëḵ dedoḵ na.

22

Bël Los Ḵele Mala-tumsën-yi

¹ Log angër sënë tato bël böp mala-tumsën-yi vu sa, lob sa halë gemala rangah nebë garas. Bël sënë nebegi verup Anutu luho Sipsip Nalu hir sëa-los-arë benevaar meneya,

² beneyoh nyëg böp yi aggata vuheng atov. Log kele mala-tumsën-yi denare loḵ bël sënë nenga vahi vahi. Lob denesis anoj beron nemadluho-bevidek-luu neyoh vu ta pin. Denesis anoj raḵ kwev. Lob kele sënë ris, og deyoh vu bë degevonḡ bemehönon nijraksën nijvesa jaḵ.

³ Log gagek maggin-yi sën Anutu nër raḵ mehönon vu muginsën lo, og ggovek ya. Gaḵ su rëḵ medo nah gökin rë. Anutu luho Sipsip Nalu hir sëa-los-arë rëḵ medo dok nyëg böp sënë. Log Anutu yi hur lo rëḵ degeḵo yi jaḵ.

⁴ Log mëm rëḵ degelë mala. Log arë rëḵ jaḵ gëp dabaj.

⁵ Su rëḵ buk dok nah gökin rë. Log ram hen huk sën netum lo, los hes hen huk sën netum lo maya. Gaḵ Mehöböp Anutu rëḵ gevonḡ rangah vu sir. Lob rëḵ denatu alam-los-bengöj medegegin ngaa pin degwata los degwata.

Yesu Rëḵ Duk Nom Pevis

⁶ Log angër nër vu sa bë, “Gagek pin sënë og yönon rot, beyoh vu bë alam pin degevonḡ geving yi rot. Mehöböp Anutu sën nevong yi Anon Vabuung vu alam-denenër-gagek-rangahsën in bë denanër yi gagek rangah lo, vong yi angër yam in bë nanër ngaa pin sën rëḵ anon jaḵ pevis lo vu yi hur lo pin.

⁷ Log Yesu nër bë, ‘Ham gwengo rë! Sëḵ natöḵ nöḵ vu ham pevis.’ Mehöti sën nesepa loḵ Anutu yi gagek sën neggëp loḵ Anutu-yi-kaḵiya agi-yiḵ ngaa sën rëḵ anon jaḵ vu tamusën lo-og mehö sënë kwa vesa!”

⁸ Log sa Jon, sa hango gagek sënë, gesa halë ngaa pin sënë. Sa hango los halë ggovek, log sa petev

menahĕp lok angĕr sĕn tato ngaa pin vu sa agi mala, gesa bĕ gako yi jak.

⁹ Lok pevis menĕr vu sa bĕ, “Su gwevong nabĕ sĕnĕ! In sa hur ti yik nebĕ hong ving arim lo sĕn sir alam-denenĕr-gagĕk-rangahsĕn lo. Geyik hur mu sa nebĕ alam sĕn denesepa lok kapiya agi yi gagĕk lo. Gak yik gwĕko Anutu yĕ timu jak.”

¹⁰ Lob nĕr vu sa ving bĕ, “Anutu yi gagĕk sĕn neggĕp lok kapiya agi, og su gegulin, in buk sĕn Anutu bĕ gevong ngaa pin agi dus rak ggovek ya.

¹¹ Om mehĕ sĕn nesepa lok ngaa nipaya lo, og yĕ medo gevong yi ngaa nipaya nabĕ saga rot. Gemehĕ sĕn nesepa lok ngaa ningĕhek lo, og yĕ medo gevong yi ngaa ningĕhek nabĕ saga rot. Log mehĕ sĕn nesepa lok ngaa nivesa lo, og yĕ medo gevong yi ngaa nivesa nabĕ saga rot. Gemehĕ sĕn nesepa lok ngaa nirĕp lo, og yĕ medo gevong yi ngaa nirĕp nabĕ saga rot.”

¹² Yesu nĕr bĕ, “Ham gwengo rĕ! Sĕk natok nok vu ham pevis. Lob sĕk gako nyĕvewen menok vu mehĕnon pin, lob sebo dok nah vu sir ti ti noh vu ngaa pin sĕn denevong lo.

¹³ Sengo ti hevong bengaa pin anon rak vu muginsĕn, log sĕk semu ngaa pin menivesa jak vu tamusĕn. Sa mehĕ muginsĕn los tamusĕn. Setu ngaa pin degwasekĕ los yusekĕ.

¹⁴ Alam sĕn deneripek hir tob bemewis nerak lo, og kwaj vesa, in deyoh vu bĕ rĕk dega kele mala-tumsĕn-yi anon. Gedeyoh vu bĕ rĕk dedok na katum nyĕg bĕp saga avi mena dedok na.

¹⁵ Gak alam sĕn nij paya verok yi nebĕ anĕo lo, los mehĕnon sĕn denevong parahek lo, galam sĕn denevong baggĕb lo, galam sĕn denesis mehĕnon

medenediik lo, galam sën denejom rak vu keriiing lo, galam pin sën ahëj neving gagek kuungsën medenenër lo, og rëk nah demedo nenga in Anutu yi nyëg böp sënë.

¹⁶ Sa Yesu, sa hevong sa angër yök vu ham in bë nanër gagek sënë vu ham sën sa alam ham lo. Yik sa sënë sën Davit* yi mewis, besa degwa vu yi. Lob yik sa sënë sën Betuheng Majelëë.”

¹⁷ Log Anon Vabuung luho Sipsip Nalu venë denër bë, “Genam!” Lob mehöti bë gengö gagek sënë, og nanër nabë, “Genam!” Log nabë mehöti ayo bev in bël, og nam, in mehöti bë nanum, og yoh vu bë nam nanum bël-mala-tumsën-yi nyëmasën.

¹⁸ Log sa bë nanër gagek niwëëk ata vu alam pin sën denengö gagek lok kapiya agi, rak ngaa sën rëk berup vu tamusën lo nabë: Bë mehöti gelu gagek ngwë dok na gagek sënë, og Anutu rëk ngupin ngaa maggin pin sën nër meneggëp lok kapiya agi nah vu yi.

¹⁹ Lob nabë mehöti gelov gagek la bër in gagek sën rak ngaa tamusën-yi meneggëp lok kapiya agi, og Anutu rëk gelov yi bër gesu rëk ga kele mala-tumsën-yi sënë anon rë. Gesu rëk dok na nyëg vabuung böp sën sa netatekin meneggëp lok kapiya agi rë.

²⁰ Mehö sën nër ngaa pin bë rëk anon jak agi nër bë, “Sëk nom pevis yönon rot!” Eë, oga! Mehöböp Yesu, genam!

²¹ Mehöböp Yesu yi semusemu nök gëp geving ham pin. Yönon.

Gagek Mewis
The New Testament in the Central/Mapos dialect of the
Buang language of Papua New Guinea
Nupela Testamen long tokples Buang Mapos long
Niugini

Copyright © 2003 The Bible Society of Papua New Guinea

Language: Buang, Central/Mapos (Buang)

Dialect: Central/Mapos

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

PDF generated using Haiola and XeLaTeX on 18 Apr 2025 from source files dated 31 Aug 2023

18a972db-abcc-5dc3-9031-f1d4455b33c3